


# AHEPERI, EKAPIITULU

## YA NEETHANU NENLI <sup>1</sup>

 . . . ohiyu, ni omwiiwa Joyce aipaka. Mwaanisuwela wira owo mwiiriirya mwa yoowo? Mwaaruusi ule, onwerya sayi wuupuwela yothene eyo? Ni khula ohiyu owo onkhalana nimosa na naanaano wa hiyo. Moota onwery'awe wuupuwela yothene eyo, owo vekeekhai mwaamukhaani ni muupuwelo w'oratta. Apwiya emureerihe mwanamwan'owo.

<sup>2</sup> Vano, meelo, iwoora piili ni minuutu miloko miraru, etthoko emosa ya masikho oCharlestown, Indiana. Munn'ihu muthiyana, oophentiwa oronwe, Munna Colvin, ninonvaha mittittimiho sookiserya, va—vatthokoni va masikho ni vamahiye, meelo oxekuwa. Mmosa otonko okhala mukumi ntoko nyuwo siry'anyu ohiy'ula, nto ovinre epantte ekina y'ekuwo weiwo onrowaanyuwo nihiku nlo. Ni othene ale anthuna okhala vamutekoni vaavo, vano, t'owaakheliwa orwa voorera. Vekeekhai onookhala mukhaliheryo muulupale wa amusi Colvin, osuwela wira etapernakulu va, vaava awo othene aronwak'aya okereja okathi munci-enexa, ni siiso, nino. . . Naamutteeliwa murima nyuwo orwa. Ni kinoona wira mu. . . Munn'ihu oophentiwa McKinney, ole aalaleiye vamasikhoni wa muhim'aka, miyaakha sinci-ene sivinre, onookhalana mpantte muulupalexwa wa masikho, ni koovekeliwa wira kirwe kimukhaliherye mmi—mmitekoni sa masikho.

<sup>3</sup> Vano, miyo koopisa vakhani, ohiy'ula. Kihaana iyuuma sinci-ene vaikho, nkinsuwela epantte xeeni y'orowa. Khureere wiihaniwa, ni soohononeya iya ni ihasara, ni athu yiihanaka, erwaaka. Mpakha, kinookhuma-ru oLouisville, okathi vakhani ovinre, wira kitthikele va vowaakuva, ni kintheeryaka wiihaniwa wunci-ene wowooceiha saana ni kinoon'aka wira, sihaana wiiriwa, nlelo, ohiy'ula. Nto vano munivekelele okathi onivar'ahu.

<sup>4</sup> Ni voosiis'ula miyo—miyo nkinaphiye va yawaka—yoosoma aka, kapiitulu 7 ya Eliivuru ya—ya—y'aHeperi. Nto okathi onikhunl'ahu yeeyo, ohiy'ula, miyo kintthuna kihimye yoohimya mwaha wa muthukumano wa Munna Graham Snelling, wenna nno muheemani, wookiseryani wa Ephiro Brigham. Apwiya yatthuna vale, kintthuna kitthike Namararu ohiyu. Nto ninookhaliha ohiyu umosa ninrow'ahu orowa ntoko oorummwa, esuman'ela okathi uwo, omuthotola Munna Graham vamuthukumanoni. Ni owo ti. . . onihimya wira, “Onikhalana muttitthi wooreera.” Ni—ni owo onoosiveliwa

hiyo orowa, wa mukhaliheryo ola. Munna Graham Snelling, khula mmosa a nyuwo onrowa okhala vamuthukumanoni, wala ontthuna, ori wookiseryani w'Ephiro Brigham wenna nno. Khula mutthu onoowerya wooleelani vary'aya-vo. Wookiseryani wene wa mapuwa ontthekuliwa, eheema t'eheliwaaya-wo. Owo onnixukhurela wiiraana wanyu. Okhala wira, hiyo ntoko etapernakulu noovarihana wiiraana wahu ni yoowo, ipursentu emiya, tivo nimphavelaahu okhaliherya.

<sup>5</sup> Vano, nto naanaanoru ninookela nipuro na, Apwiya yatthuna vale, kapiitulu 11 ya aHeperi, ohiyu kamosa-kamosa, Muluku atthuna vale, nto iwe kinoona wira ninoorowa okhalana okathi muulupale nave.

<sup>6</sup> Oh, Apwiya aanireeriha voosiis'ula mwa enamuna yooreerexa, moota Awo amwaraxenly'aya Erooho Aya mwa hiyo! Nto vano, ohiy'ula, hiyo ninwehererya wira Awo animwiira-tho; nto numala Namararu ohiyu, ni siiso. Ni—ni ohiyu kinihaleel'aka, Munna Neville onookhala vaava wira atthikele, kaahikhale vale.

<sup>7</sup> Miyo nkinasuweleke enrow'aka wira, nyuwo pooti okhala va ewoora ela, nto ewoora ekina wiihaniwa oCalifornia. Moone, nyuwo khamunsuwela otthu Apwiya anrow'aya woorumani-wo. Mwaha wa yeeyo enikhal'aya yoorika wa miyo opaka mittala ni wira nni—nnimwiira *elexe n'elexe*. Miyo pooti opacerya wira etthu emosa, Apwiya khukiruma nipuro nikina. Munnona? Tivo hiyo khaninsuwela tu etthu Awo anrow'aya wira. Masi, "Apwiya yatthuna vale," hiyo ninoohimya. Nto miyo kinoona wira hiyo ninnivahiwa muteko, ahiiso ninnirummwa wira, mBibiliani, "Apwiya yatthuna vale, hiyo nnimwiira itthu *lexe n'elexe*." Vano yairaneya wira khanimpaka ilaiha-nelo hiyo. . . wala omaliherya ilaiha-nelo, ninnoona wira khino Apwiya khiyaatthunela wira yiiraneye.

<sup>8</sup> Nihiku nlo, hiyo naahivariwa, Munna Roberson ni Munna Wood ni yoomi. Nto hiyo nitikinihiwa, "Mwaha wa xeeni?" Nikilanthene vale, niwehaka maapha, nirwaaka nno, ni neettiha ikilomo miloko mithanu na miraru nitthikelaka-tho onikela ephayo muramphani. Ni miyo kinneettaka mukwaha muramphani aalupale okhuma waarin'aka miyaakha muloko ni mixexe. Ni kinniikoha moota kiiraly'aka. Hiyo neemenle vale, othene hiyo araru. Hiyo othene ninneettaka arampha aalupale. Niwehaxaxaka maapha, nikhalaka mwa 130, niviraka oIllinois, nto naahirukunuwa vakhani, nihiwehaka wira nsuwa naari ottuli wahu ohiya ohoolo wahu. Naarowa onikela ephayo ohiya okuusini. Nto naanaanoru, khutupha ephiro, miyo khwira, "Ela kehiyo ephiro y'ekeekhai." Khuweha vale, khuphiyerya osuwela wira, hiyo naari ikilomo miloko mithanu na miraru nihin'ye-ene ephiro. Naarowa nitthikaka . . . ? . . .

9 Vano vatthikaly'ahu, hiyo—hiyo naamulavula. Miyo khwira, “Moosuwela mwah'aya? Hiyo...Apwiya khino aroonihapuxerya ephiro yeela, wira ehiniphwanye ehasara yootakhala nipuro nlo wenna, alekela yaarowa okhumeleliha etthu. Hiyo noosuwela wira itthu sothene sinvara muteko vamosa wira areerihwe ale anaaphenta Apwiya. Eyo ti yothene erin'ahu okhalana mmuupuweloni.”

10 Vano, ohiy'ula, nimpacerya vano nisomi naamukhaani no wiixuttiha. Nto miyo ka...Nkinuupuwela wira ninoomaliha, khino ninoomaliha ohiy'ula, wira...Ela ekapiitulu yuulupale yo wiixuttiha mwaha wa ovaha sanamuloko, ekereja. Nto owo mwaha muulupale, vaavo naakhanly'ahu okhalaka-vo isumana ni isumana, mw'etthu emosa yeeyo, moota Abrahamu aamulivaly'awe sa namuloko Melikhiseteki, ni vakhala wira ti yuulupalexa.

11 Nivekhulelo nla ninnimuhaaxa mutthu iwo? Mwaamwamputi ottipihwa? Naamuhaaxaka mutthu, waavekhulela wiitho waya, khula nimosa wa mavekhulelo. Vakhala siiso, nvenxe matata paahi. Nto, wala mmurume mmosa w'anamukhora, mmurume mutthu wa munna va, owo onimoottipiheryani iyo. Ni miyo kinnisyakiha nlo mmansaka; kinimooni oviha ni khunarettheela, nto, naanaanoru, ki—kinilala vammilo. Tivo, eri ni nyuwo, vano nlo khaninrowa okihaaxa miyo mwa hata enamuna. Hiyo nintthuna wira nyuwo mukhale oowitthyala vano.

Khaninrowa ophavela okuxa okathi anyu munci-enexa, masi ninrowa paahi olukama Masu. Nto nihinathi wira, nrowe nilavule ni Mwaneene okathi vakhani.

12 Vano, Tithi a Wirimu, hiyo khaninsuwela etthu esukiwe. Masi etthu emosa paahi ensuwel'ahu, ni nikhanly'ahu ookupali, wira itthu sooreera siri ohoolo wahu. Maana yoolepwa, “Niitho sihoonaly'aya, nnakhala naaru sihiwaly'aya, nnakhala sihiphiyale mmurimani mw'atthu, seiyo Muluku orin'awe asukeriwe ale, animphenta Yoowo.”

13 Nto hiyo ninvekela wira Nyuwo mutthukule icanela sa Wirimu ohiy'ula, mpaani mw'Anyu m'osuka, ni munivahe Masu Anyu, anrowa okhala etthu emosa eri yoophwanyiha etthu, wira yincererye waamini wahu ntoko aKristu, ni ennikhalihaxa—oolipaxa mwa Ehapari yooreera, ovikana ele naary'ahu okathi ovolonw'ahu. Munivahe, Tithi. Wira Erooho Yoowaarya ekuxe Masu a Muluku ni evahe Yaawo khula murima ntoko sintthun'ahu. Mwa Nsina na Yesu, hiyo ninnivekela, Mwan'Inyu oophentiwa. Amen.

14 Vano, voosiis'ula, nihiyaka eversiikulu yookiserya ya kapiitulu 6, wira niwerye okela mwa 7.

*Memmo muhooleli mwaha wa hiyo oken'awe-mo, Yesu, khukhalihwa namukuttho muulupale a mahiku othene, enamuna ya Melikhiseteki.*

15 Vano ninrowa osoma iversiikulu tthaaru soopacerya, wala iversiikulu piili soopacerya, ahiiso iversiikulu tthaaru soopacerya, kiireke, sa kapiitulu 7, wira niwerye opacerya naanaanoru.

*Okhala wira Melikhiseteki ula, mwene a oSalemi, namukuttho a Muluku muulupalexa, aakumanne n'Abrahamu okathi aahokolow'awe waawiv'awe mamwene, ni khumureeraha;*

*Yoowo-tho Abrahamu aanvahaly'awe epannte ya namuloko ya itthu sothene, (vo ti vari sa namuloko sanyu); goopacerya ontaphuleliwa Mwene a exariya, . . . nuumala-tho Mwene a oSalemi, okhanle, Mwene a murettele;*

*Oohikhalana tiithi, oohikhalana maama, oohikhalana nloko, . . . nnakhala epacerelo . . . ohirina hata epacerelo ya mahiku, nnakhala emalelo y'ekumi; masi aakhalihwe oolikana ni Mwaana a Muluku; onnikhala namukuttho a mahiku othene.*

16 Nuulumo xeeni nooreerexa! Vano nihaana otthikela mwa Waataana Wa Khalayi, wira nithipule irimarima iya suulupale. Ni, oh, moota kiniphent'aka seiyo!

17 Moosuwela, wArizona, hiyo naanihottelaka. Nto naanikelaka nipuwa naakhalaka ntoko noophwanelela, Mwenye Mc Anally ni miyo. Nto naanoona nipuro vaavo vooneya ntoko, malitti makhaani, memmo mulithi mwaamukhaani, yoowo awo aniihan'aya "iworokholelo." Nto kaani . . . Owo aanikiroiha iwe ni okittikitthiha muhaava ni "whish," wiiseela. Vano otthikittha ni "whish," wiiseela. Nto miyo kaaniikoha mwaha wa xeeni owo iirel'awe siiso. Khuphiyerya osuwela wira, moone, mwaaiseelaka mihaava, owo onoopatta. Nto sothene, hata ecumpwi, ti yooveya ovikana eweero. Eweero ti yoolemelexa ovikana ecumpwi. Tivo nyuwo mwaaiseelaka, iyuuma sothene sikina ni mihaava ni nikhurumela sinoomwareya, masi eweero enoohala vathi. Tivo, nyuwo mwaphwanya itathela kamosa-kamosa sa osulu nno, enooniherya wira wookhala murayi wa eweero nipuro nlo osulu iwe. Epula ela eroothomola itathela iya sikhaani. Tivo nto naakuxa ipikareeta ni siiso, ni naanihalela, othipa mwaako, niphavelaka ophwanya eweero ela. Naanipaka miithe vathi, othipa. Naanimuhela tinamiite, ophula. Naanithikela niphulaka miithe iyo, nikhuruwelaka mpakha hiyo ophwanya, wira niphwanye mutika muulupale. Vano, eyo t'ile eniihan'ahu "ohottela."

18 Nto ohiy'ula nimphavela okuxa Masu a Muluku, ni orumeela Yaawo n'uwerya wa Erooho Yoowaarya, wira ekumihe ohicaliwa

wothene ni ohoverya mwa hiyo, itthu iyo sothene sikhaani sooveya sooreseya sihirina hata mulipiheryo, sihirina hata elemelelo mmakhaleloni mwahu, ninthuna niphule sothene iyo wira niwerye ophwanya Mutik'ola woovuwa. Mutik'owo ti Kristu.

<sup>19</sup> Nto vano Muluku anikhaliherye okathi onsom'ahu ni oxutta mwa Masu Awe. Ikapiitulu tthaaru, sookiserya s'ottuli, ntoko, ninnikhalaka nilavulaka mwaha wo omwiiwa, naanaano va ni ohoolo, Melikhiseteki.

<sup>20</sup> Vano, miyo kinoona wira Paulo onnitaphulela oratteene.

*Tthiri Melikhiseteki ula, mwene a oSalemi, . . .*

"Mwene a oSalemi." Ni khula nammusoma Bibilia onnisuwela wira Salemi aari khalayi. . . Yerusalemu khalayi wihaniwa "Salemi." Ni Owo aari Mwene a oYerusalemu. Nkanweheni Yoowo.

*. . . namukuttho a Muluku muulupalexa, (owo ti mulapeli), yoowo aakumanne ni Abrahamu. . .*

Kinthuna kiphwanye nloko Nawe, Mutth'ula muulupale, wira nyuwo musuwela ti Pani Owo, toko, vano nto nyuwo. . . ninookelela ohoolo ni wahala ene.

*. . . atthikaka waawiiw'awe mamwene, ni khumureeriha;*

*Wa yoowo. . . Abrahamu aanvahaly'awe epantte ya namuloko. . . yoopacerya. . . entaphuleliwa Mwene a exariya, . . .*

Vano nwehe, "Exariya." Vano, hiyo nirina exariya ahu mmansihu, nirina exariya yowiiipaka, hiyo nirina exariya yoonononeya, ya inamuna sothene. Masi yookhala exariya emosa y'ekeekhai, nto exariya eyo enikhuma wa Muluku. Nto Mutth'ula aari Mwene a exariya. T'ani Owo aakhanly'awe okhalaka?

<sup>21</sup> Vano, Owo aari Mwene a exariya, Mwene a oYerusalemu, Mwene a exariya, Mwene a murettele. Yesu aahaniwa, "Mwene a murettele." Ni mukhulupale ti mwaana a mwene. Tivo, Mutth'ula aari Mwene a murettele, nto Owo aahaana okhala Tithi a Mukhulupale a murettele. Munniiwa?

<sup>22</sup> Vano nrowe noone, nikuxe nloko Nawe ohoolo vakhani, wira noone othhu onrow'ahu.

*Oohikhalana tiithi, . . .*

Vano, Yesu aahikhalana Tithi. Nyuwo munnaamini yeeyo? Vekeekhai Owo aahikhalana.

*. . . oohikhalana maama, . . .*

Yesu aahikhalana maama. Masi Mutth'ula khaarina hata tiithi nnakhala maama.

*. . . oohikhalana nloko, . . .*

Owo khonakhalaneke hata mutthu Owo aakhumm'awe-wo, hata nloko. Owo aahikhala kweekwe. "Oohikhalana nloko."

*...ohirina hata epacerelo ya mahiku,...*

Owo khonakhalaneke hata okathi Owo otonko awe opacerya.

*...nnakhala emalelo y'ekumi;...*

Vaamuweryaneya okhala etthu ekina woohikhala Muluku. Ti yeeyo tu yaakhanle okhalaka.

<sup>23</sup> Vano, vano mwaweha vale okathi onsom'ahu eversiikulu enttharelana. Munnona? "Yoopacerya, ekhalaka mwa otaphuleliwa, Mwene a exariya." Kahi vaavo onthun'aka opacerya. E—eversikulu 3:

*...nnakhala emalelo y'ekumi; masi aakhalihwe oolikana ni Mwaana a Muluku;...*

Vano, Owo khaari Mwaana a Muluku, maana, vakhala wira Owo aari Mwaana, Owo aahikhalana epacerelo. Nto Mutth'ula khaarina hata epacerelo. Vakhala wira Owo aari Mwaana, Owo aahaana okhalana oowaili tiithi ni maama. "Nto Mutth'ula khaarina hata tiithi nnakhala maama. Masi Owo aakhalihwe oolikana ni Mwaana a Muluku."

*...onnikhala namukuttho a mahiku othene.*

<sup>24</sup> Vano, Dr. Scofield omphavela ohimya, wira, "Owo waari onamukuttho, waaihaniwa, 'Onamukuttho wa Melikhiseteki.'"

Masi kintthuna paahi kikuxe yeeyo ni nyuwo mwa minuutu vakhani paahi. Vakhala wira waari onamukuttho, weso waahaana okhalana epacerelo, ni waahaana okhalana emalelo. Masi, "Ola khaarina epacerelo nnakhala khaarina hata emalelo." Ni owo khohimye wira aakumananne onamukuttho. Owo aakumanne ni Mutthu mmosa, ni aamwiihanne Nsina Nawe "Melikhiseteki." Owo aari Mutthu, kahi muromolelo, kahi o—o—onamukuttho wala otiithi. Owo aari voomalela Mutthu ni Nsina na Melikhiseteki, yoowo aari Mwene a oYerusalemu. Kahi onamukuttho, masi Mwene oohikhalana tiithi. Onamukuttho khorina tiithi. "Nto Mutth'ula aari oohikhalana tiithi, hata maama, oohikhalana epacerelo ya mahiku wala emalelo y'ekumi." Vano, Mwaana a Muluku...

<sup>25</sup> T'ani aari ola, ola aari Yehova. Ola aari Muluku Oowerya sothene Mwaneene. Khaakhanle okhalaka mukina.

<sup>26</sup> Vano nwehe, "Owo onnikhala mahiku othene." Owo ookhalana onamoona va, wira, "Owo onnikhala. Owo khankhwa." Owo khonatoko wira...Owo khonatoko okhala etthu ekina masi mukumi. "Owo onnikhala mahiku othene."

<sup>27</sup> Vano, Yesu aahikhalihwa, oolikana ni Yoowo. Vano, mwaha aya okhalenly'aya ovirikana varyari va Muluku ni Yesu: Yesu aahikhalana epacerelo; Muluku khaarina hata

epacerelo. Melikhiseteki khaarina hata epacerelo, nto Yesu aahikhalana epacerelo. Masi Yesu aahikhalihwiwa, oolikana ni Yoowo. “Namukuttho, onkhala mahiku othene.”

28 Vano, okathi Melikhiseteki aary’awe elapo ya vathi, Owo khaari hat’etthu mulaponi woohikhala ye—Yehova Muluku owooniheriwa ni yoopattuxiwa, Owo aari muumu ntoko eteyofaniiya. Abrahamu aahikumana ni Yoowo emaara emosa, muheemani mw’awe. Nto ntoko sihimaly’ahu voosiis’ula, “Abrahamu aahimusuwela Owo. Ni Owo aahimuleela Abrahamu etthu aarow’awe wira, okhala wira Owo khaarowa omuhiya murithi a olumwenku oochoona itthu Owo aarow’awe wira.”

29 Mukihiye keemele vaava minuutu mmosa, wira kiire, Muluku nlelo ookhalana muupuwelo yoowo wa Ekereja Awe. Nyuwo khamuhiyo aana a mw’epiphini. Nyuwo mwa aana a Mowaaryani. Ni e . . . hiyo ni . . . “Ooreeriwa t’ale oowiimaaliha, maana anoorthi elapo.” Nto Muluku aamwiira, Yoole aapakale ni—ni Abrahamu, yoowo aari wira arithi elapo. . . Ni Owo iirale, “Miyo nkinimwiipithiherya itthu iya mutthu onrowa orithi elapo.” Khotempe Owo wuupululela isiiri Sawe Ekereja Awe enrowa orithi elapo!

30 Daniyeli ohimnye wira, “Nihiku nenlo awo anoothimakela nno ni iwe, osuwela onimuncerereya.” Ni owo ohimnye wira, “Ale aankhili anoomusuwela Muluku aya, nihiku nenlo, ni anoovara miteko soosuwanyeya suulupale nihiku nenlo. Masi ale ootakhala murima khanrowa omusuwela Muluku a Wirimu.” Awo ammusuwela Owo mwa enamuna emosa ni mwa eyiirelo, ntoko nisomi nahu noopacerya nihimaly’aya, masi awo khammusuwela Owo mwa enamuna ya oloka voomalela.

31 Ni Muluku onwerya paahi ovara muteko mwa oloka voomalela, okhala wira Owo t’oloka voomalela. Nittotopeliwe Nsina Nawe! Ohaana okhala moovira mooloka voomalela memmo Muluku onvar’awe-mo muteko, okhala wira Owo khoniira etthu ekina woohikhala ovara muteko mwa oloka voomalela. Owo khokhanle wiikhalihaka nlepa Mmansawe mwa hata enamuna. Vano nto tivo Yesu aaruuly’awe wira akumihe itampi sahu, wira hiyo nikhalihwiwe ooloka voomalela, wira Muluku awerye ovara muteko ni Ekereja Awe. Ti vaavo esiiri ery’aya-vo.

Ti vaavo olumwenku okhanly’aya wochoona. Ti vaavo awo antthun’aya ohimya, wira, “Moovahuwa muupuwelo anyu.” Ti vaavo awo antthun’aya wira, “Nyuwo khamunsuwela etthu enihim’anyu.”

Okhala wira, “Itthu s’Apwiya ti s’elolo wa osuwela wa olumwenk’ula. Masi itthu sa molumwenkuni ti s’erutthu wa mulipa-oowaamini.” Tivo, nyuwo mwa mutthu oovirikana, munkhala mwa mukhalelo woovirikana. Nyuwo khamuhiyo-

tho a olumwenku yoola. Nyuwo moovira mw'ekumi ila khukela mw'Ekumini esya.

<sup>32</sup> Tivo, Muluku onnuupululela, kahi olumwenku, kahi wa pisikooloku, kahi w'arumeyi oosoma, masi w'ale oowiyeviha mmurimani. Atthu awe akhanle oowiimaaliha, Owo onoowuupululela isiiri sa itthu suulupale sa Muluku, yaawo. Munnoona yeeyo?

<sup>33</sup> Vano, vano, Abrahamu aari wira arithi olumwenku. Mwa e. . .Osuulu w'Abrahamu waari wira maloko othene areerihwe. Tivo Muluku aahikhuruwa khulavula ni yoowo, mwa mukhalelo wa Mutthu.

Vano, Muluku okathi wothene onnikhalaka mulaponi. Muluku khonahiyeke elapo ya vathi. Vaakhanle wira Owo aamukhalakhala ahiyaka elapo ya vathi, nkisuwenle etthu yaarowa okhala yeeyo. Masi Muluku okathi wothene onnikhala mu mwa mukhalelo mmosa. Oh, nivuwihwe Nsina Nawe!

<sup>34</sup> Owo aari n'ana mothakoni, akhumaka wEjitu, mwa mukhalelo wa Waarya. Owo aahilavula ni Abrahamu mwa mukhalelo wa Mutthu. Owo aahilavula ni Moise mwa mukhalelo wa Mutthu. Owo aahilavula ni Ekereja mwa mukhalelo wa Mutthu, Mwana Awe, Kristu Yesu.

Ni Owo onlavula muhina mwa Ekereja Awe olelo, muhina mwa Ekereja yoottikittheliwa ya Muluku mukumi, mwa miyaapu s'oloko. "Nyuwo mwa irintta. Miyo ka Eviteera." Muluku nlelo onoolavula, nto olumwenku onimoona Yesu ntoko nyuwo onimoonihery'anyu Yoowo. Ti siiso olumwenku sinoon'aya. . . "Nyuwo mwa ipaphelo soolempwa, sinisommwa n'atthu othene." Makhalelo anyu annihimya ele mukhanly'anyu.

<sup>35</sup> Vano, Abrahamu ula mphironi mwawe, atthikaka. Ninrowa otthikela ottuli nisome sa yoowo okathi vakhani, muLiivuruni mwa Maphattuwelo. Kapiitulu 14 ya Maphattuwelo, kookupali wira ti yeeyo. Oh, moota ekhanly'awe wahala ooreera va! Vano, hiyo othene ninnisuwela sa Abrahamu, moota Muluku aamwiihann'awe okhuma muttethe wa oKhalteya ni muttethe wa oUri, nto khimuleela wira aivalaanihe n'axirikh'awe.

Muluku onniwiihana alopwana wala athiyana, Owo oniihanela ovalaana.

<sup>36</sup> Vano, owo t'uri mulattu ni ikereja olelo, iyo khasinthuna wiivalaaniha n'ale eerutthu oowa-. . .oohaamini. Mwaha wa yeeyo ehinwery'ahu orowa ottaiwene. Hiyo nnoophiyerya paahi mw'evirelo ele ya mw'erutthuni, nto hiyo—hiyo nniira, "Oh, Jim mutthu ooreera murima, owo awurya-ru. Vakhala wira owo. . .Ni kinnirowa ni yoowo opilyaareni, masi miyo nkinttikha ipilyaare. Miyo—miyo—miyo kinoorowa ni yoowo oniirani. Awo annilavula iperwa soonanara, ni siiso, masi miyo nkinlavula hata emosa."



37 “Mukhume eriyari aya.” Ti yeeyo. “Mwiivalaanihe. Muhikwanye itthu saya soonanara, nto Miyo kinoowaakhelani,” anihimya t’Apwiya. “Muhiitthukelele ekheero n’atthu oohaamini, owiitakaniha ekheero voohilikana.” Muhiire siiso. Mwiivalaanihe.

38 Nto Muluku aahimwiihana Abrahamu wira aivalaanihe amusi awe othene, ni wira eetteke ni Yoowo. Munna, imaara sikina enihimya ohiya ekereja. Yaahihimya yeeyo wa Paulo. Owo aahaana ohiya ekerej’awe. Yaahihimya yeeyo w’anceene. Imaara sikina enihimya okhuma owaani. Imaara sikina enihimya waahiya atiithi n’amai, ni ohiya sothene. Miyo nkinihimya wira t’eniir’aya khula okathi, masi imaara sikina enniira. Enihimya wira nyuwo muhaana okuxa sothene eriyari ya nyuwo ni Muluku, ni weetta ni Yoowo paahi. Oh, opatthana iwe, wooreerihwa woosiva, opatthana iwe munkhalan’anyu okathi muniivalaanih’anyu ni itthu sa molumwenkuni ni alipa-oowaamini a mw’erutthuni yaawo anootheyani, ni weetta meekh’nyu ni Kristu!

39 Imaara kavi kimuxukhunru aka Mulku! Owo iirale, “Miyo kinimoovahani axitiithi ni aximai mulaponi mu. Miyo kinimoovahani apatthani ni axirikha. Ni nkinkhalakhala koohiyakani, nnakhala woonyanyalani. Hata wira olumwenku wothene onimoorukunuwelani ettuli, Miyo kinoorowa ni nyuwo, mpakha w’okiseryani w’ephiro.”

40 Mureerelo xeeni wooreerihwa, mutthu orin’awe mutharamulo yoowo wira amutthareke Pwiya Yesu, wira aivalaanihe n’axirikh’awe othene a mw’erutthuni, wira aatthareke Apwiya! Nto mutthu akhala ntoko ohiiseettiha orateene, ni wiisooniherya ntoko aKristu, masi ephentaka itthu sa erutthu, vanreerela mumphavele mwaapara mukina naanaanoru. Ti yeeyo. Nto aahikhale hata mutthu ontthuna weetta ni nyuwo, ookhala Mmosa olaihenrye weetta ni nyuwo. Owo ti, Pwiya Yesu oottotopeliwa, Owo onimweetta ni nyuwo.

41 Muluku aahimuhimeerya Abrahamu wira, “Mwiivalaanihe.” Nto vookhalaxa mutthu ntoko Abrahamu saary’awe, owo aahaakuxa atith’awe, owo aahimukuxa mwaana a munn’awe, musulu awe; othene empharelenle yoowo. Ni Muluku khonamureeriheke mpakha owo wira etthu Muluku aamuhimenry’awe wira aire.

42 Nkinihimya wira nyuwo khamuhiyo muKristu. Eyo, miyo nkinimukumiha okristu hata mutthu. Masi kinoohimya ela, wira vakhala wira Muluku ooleenleni etthu yo wira, Owo khonrowa wooreerihani mpakha nyuwo wira. Miyo kiri vapulpitu ohiy’ula n’imosa wa itthu seiyo sikivarelelaka. Mithukumano saka khasinkhalaka ele saarin’aya okhala, mwa iyaakha piili sivinre. Okhala wira miyo kiroovonya w’Apwiya. Awo yaakileenle wira,

“Murowe wAfrika, numala murowe oHintiya.” Ela eri va, yoolepwa vaava va, ottuli w’Eliivuru ila, naanaano va.

43 Mukhulupale a muteko khukiihana, khwira, “Mwaahiye mAfrikaani awo arowe. Hintiya oolikana.”

44 Erooho Yoowaarya khukirweela, khwira, “Munoorowa wAfrika ntoko Miyo soohimenry’akani.”

45 Nto khuvira mwaakha mukina. Vano akhulupale a muteko...Kooliyala Yeeyo. Owo khwira, “Ninrowa oHintiya. Ittikitti iya siri va.”

46 Miyo khukhuma, khuliyala Eyo mpakha ophiya oLispowa. Ohiyu umosa, wira, miyo koono wira kaamookhwa. Voosiisu aya miyo khupacerya, orowa oxooro, wira karape. Oh, nkaareere owereiwa, nkaawerya weemela. Vale, Waarya iwe wiithomeiye-ene oxooro, khwira, “Miyo koono wira koohimenryeni, ‘Orowa wAfrika, toko.’”

47 Mithukumano saka sinnikhalaka soovonya vakhani-vakhani okhuma okathi yoowo. Enamwi kaaronwe oHintiya, ni oophiyaka emilyawu nuusu yeemenle-ene vale, masi iwo khiwaari wira ele Muluku aahimmy’awe wira kiire. Kinnoona wira mithukumano saka khasinrowa-tho okhala mureerelo mpakha kirowe naanaanoru khakhalihe oratteene etthu iyo. Hata wira kiniira exeeni, ti wAfrika, toko, okhala wira muhaana wira. Vale ari Masu a Muluku Ahinimala, amphwanyaneya vale. Miyo kaahisuwela saana wira kiire. Masi kihaana otthika. Ni kinoona wira mwaakha ola onrwa p’ukathi onrow’aka waapaseya kikhumaka munikosini, ni mukhaliheryo w’Apwiya.

48 Ehapari yooreera ela, yoovuwa ya khalayi yeeyo eninnuwa vookhweya, ntoko mwiri wa karvaalyo, masi kookupali wira owo onihaleela omwarya irintta saya vano. Miyo kookupali, Mutthak’ola muulupale ni etthu yuulupale, kookupali wira Apwiya anoonitthuniherya ottikinya olumwenku emaara ekina wa ovuwa wa Muluku.

49 Muhaana wira ele Muluku oohimenry’aweni wira. Nto Abrahamu aahikelela ohoolo, khwaakuxa amusi awe ni yoowo. Owo aanaaphenta. Eyo epantte ya omutthu. Masi nuvira okathi vakhani, vakhani vakhani, atith’awe yaahikhwa nto owo khwaavitha. Numala owo khimukuxa musulu awe, waakhulana ni onyakulihana khupacerya. Nto, vookiserya, Lothi khukuxa othanla wawe khurowa oSotoma. Nto mwaweha vale Abrahamu, owo khaanyakulihanne ni Lothi. Owo iirale, “Hiyo n’axinna. Nihikhaleke oovaanyihana. Masi nyuwo nvenxe muru murowe khula epantte munthun’anyu orowa. Mwarowa onkhuma nsuwa, miyo kinoorowa onkela nsuwa. Mwarowa onkela ephoyo, miyo kinoorowa okuusini.” Owo ti mwiirelo w’Ekristu, otthuna onvaha mutthu mukina yoolokaxa y’evarihanelo. Kweekwe mmooniherye, mmuhiye owo akuxe ethanlelo awe.

50 Mwaha wa xeeni? Exeeni yaamwiirihale Abrahamu wira yeeyo? Owo aahisuwela wira aahilaiheriwa ni Muluku wira aamurowa orithi etthu yothene, khula enamuna. Amen. Vano, nto, eheema wala murapattha, exeeni naarowaahu ovela-velela? Etthu yothene ti yawihu. “Ooreeriwa t’ale oowimaaliha maana anoorithi elapo.” Yothene eyo ti yawihu. Muluku ohimnye siiso. Tivo munvahe mutthu ele yoolokaxa wa othanla, owo atthuna vale. Khino ti yeeyo tu owo onrow’awe okhalakhala aphwanyaka. Masi yothene eyo ti yawinyu, alipa-oorithi woopowa mwaha wa natiri. Sothene ti sawinyu.

51 Tivo, Saara, muthiyana oomalela oreera mulaponi, owo aakilanthe vale mukerekhere mwa ntumuxa n’aiy’awe ntoko vaatthuney’aya wira. Owo vooloka, ahe, khino siiso aawanre ivistiitu iye soolimaleleya sa kaliko, wala etthu p’itthu munthun’anyu wihana. Okathi, Muhano Lothi aawanry’awe ntoko namilyawu. Nto aiy’awe yaari mukhulupale a mpooma. Awo yaari mphuki aakilaathi vamukhora. Owo aahikhalana itthu sothene; aanikhala mithukumano sothene s’ottottha ni maira a iturufu yaairaneya oSotoma ni Komora. Masi Saara aasivelaxiwa okhala n’aiy’awe voothoiwa, ni osuwela wira owo aari mwa otthuna wa Muluku, ohiya opuha mihakhu sa, ahiiso, opuha mihakhu s’okathi. Ti yeeyo. Owo p’ukathi Muluku onthotol’awe.

52 Nto nihiku nimoso, nyuwo, vekeekhaixa ntoko sinikux’anyu ephiro yootakhala, enimoovarani nihiku nlo. Nyuwo pooti wuupuwela wira munookhala saana. Pooti wuupuwela wira munoovira ni yeeyo, masi khamunvira. Pooti okhala ntoko wira sothene ti sowiipithihiwa, masi khasiipithihiwe. Muluku onnisuwela sothene. Owo onnisuwela sinto nyuwo munlapa vaxariya wala nnari. Owo onnisuwela sinto vekeekhai munnimwaamini Yoowo vaxariya ni wira muhoopowa, ni moomukupali Yoowo, ni wira muhookhwa wa itthu sa molumwenkuni, ni wira nyuwo mwa mukumi mwa Kristu. Owo onnisuwela eyo.

53 Vano, hiyo ninnimuweha Abrahamu, kintthuna wira nwehe erooho ela y’ekeekhai. Oh, etthu yothene yooreerihiwa wa mahala. Kintthuna wira musome ni miyo vano okhuma kapiitulu 14 ya Okhuma, okathi vakhani paahi.

54 Vano, etthu yoopacerya yaakhumelenle awo vaaphiyaly’aya iwe, Lothi aahiphwanya mulattu. Mwaha wa xeeni? Owo aari ota wa otthuna wa Muluku. Nto nyuwo mwaphwanyaru mulattu okathi onikhal’anyu mwa otthuna wa Muluku, Muluku onimookhaliheryani. Masi nyuwo mwakhala mmulattuni, ota wa otthuna wa Muluku, eri etthu emosa paahi yo wira, otthikela-tho mwa otthuna wa Muluku.

55 Vano, mamwene othene yaahiiraana vamosa, ni yaahitthokelela wira itthaya sowaataleleya iwe saari sookhala

maasi saana, ni wira yaamurowa tu ni omukuxa Sotoma ola ni Komora mwaamukhaani, yaamuxintta. Ni yaahixintta. Nto okathi aronw'aya khuxintta, yaahimukuxa Lothi ni yaawo.

<sup>56</sup> Kintthuna wira nwehe Erooho ya Kristu va mwa Abrahamu. Vano nkawehani eversiikulu 14.

*Nto okathi Abrahamu aiwaly'awe wira munn'awe . . . (Munniiwa?) . . . munn'awe aahivariwa, owo aahaatthokiha arumeyi awe ooxuttihiwa, yaayariwe owannyawe, imiya tthaaru ni muloko n'athanu n'araru, khwaalupattha mpakha oDani.*

<sup>57</sup> Oh, muupuwelo xeeni wooreerihwa wa mahala! Abrahamu, okathi munn'awe, onamwi aamonre mwa mahala, onamwi aari mwa mukhalel'ola w'otthikela ottuli, vaaiwaly'awe wira olumwenku waahinvara, ni waahinvara khimukuxa, wira wamwiive, Abrahamu aahiira ethu ni Erooho ya Kristu. Owo aahirwa khuwinnya iyuuma s'ekhotto axilopwan'awe othene yaayariwe owannyawe, nto aahaatthara, khwaatthimakela ephiro yothene mpakha oDani. Nto Dani ipantte soorakama sa oPalestina, "Dani mpakha oPeeri-xeepa," okhuma ekhomo emosa mpakha ekina. Nto eyo ethooneryo ya Kristu, okathi Owo oonaly'awe wira olumwenku waahikuxa . . . waahimora, Owo aahimutthimakela nwanani mpakha wookiseryani, wira aakhele nloko na Atamu naamonre.

<sup>58</sup> Kintthuna wira nwehe eversiikulu enttharelana, osivela xeeni va Erooho enlavul'aya mwa yoowo. Vaareera, versiikulu 15 vano.

*Nto owo aahikuxa-tho sothene (sothene) mireerelo, ni aahimooopola-tho munn'awe Lothi, ni mireerelo sawe, nave-tho athiyana, n'atthu.*

<sup>59</sup> Okathi Abrahamu aamutthanry'awe nwanani aamukunxe munn'awe, owo aahimutthara elapo yothene mpakha oDani, khuhokoloxa sothene saampweteiye moomorani.

<sup>60</sup> Elatarato xeeni yooreera ya Kristu, Yoowo aaiwale okhuma Wirimu wira hiyo naahirimeela nto khurwa khumwiikara nwanani, ephiro yothene mpakha omooroni, ni khuvara minepa soorimeela khuniruuha anihokoloxaka ni khunihokoloxerya itthu sothene saarin'au nihinatthi omora! Hiyo, anamatthikela ottuli, hiyo niyariwe wira nikhale aana a Muluku, naahononiwe khukhala aana a xetwani, ni khuniiriha . . . naatthara itthu sa molumwenkuni, ni nairale soonanara, ni khutthimaka voowunlelaxa ntoko Lothi sairaly'awe, nitumihaka ihaakhi sahu s'eyuulupale oyariwa nittharaka itthu sa molumwenkuni. Kristu aahikhuruwa. Ninamwi naamonre; Muluku, asuwelaka wopaceryani t'ani aarowa woopowa ni t'ani ahaarowa, tivo aahikhuruwa khumwiikara nwanani muhina mwa ekumi, muhina mwa okhwa, muhina mwa eparatiiso, mpakha omooroni. Ni okhuma Movuwani mpakha omooroni, khukuxa i-ikuru

sa omooroni, ni khukuxa ihulelo wa xetwani, khuhihimuwa, khwaareherya atthu, wira akhale aana alopwana n'athiyana a Muluku.

<sup>61</sup> Munnoona Erooho mw'Abrahamu iwe, Erooho ya Kristu erwaaka ni yoowo?

<sup>62</sup> Vano kintthuna wira nwehe ohoolo vakhani, okathi onsom'ahu.

*Nto mwene a oSotoma aahirowa okumana n'uwo ahokolowaka waamuxinttalyawe mwen'ola Ketorolahomeri, ni...mamwene...yaari ni yoowo, okhatoni wa oXave, ekhanle ekhato ya mwene.*

<sup>63</sup> Awo yaahikhuma. Mwene a oSotoma aahihokoloxiwa. Munn'awe ahihokoloxiwa. Aana yaahihokoloxiwa. Nto va khikhuma mamwene wira yakumane ni yoowo. Ni, nave-tho, va ti nipuro miyo ontthun'aka ophiya-vo, mutthaka vano. Nwehe va.

*Vano—vano Melikhiseteki, mwene a oSalemi (Mwene a oYerusalemu, Mwene a murettele) aahiruha mukatthe n'iviinyu: ni owo aari namukuttho a Muluku muulupalexa.*

*Vano owo aahimureeriha, khwira, Mureerihiwe Abrahamu ni Muluku muulupalexa, mwaneene erimu n'ilapo ya vathi:*

<sup>64</sup> Melikhiseteki, Mwene a oSalemi, nave-tho aahiisooniherya Mmansawe eriyari ya mamwene makina. Nto nwehe, ekhotto yaahimala, Erooho ya Muluku mwa Abrahamu, ya Kristu, yaamuhokolonxe munn'awe aamonre, vano khimuhokoloxerya mukhalelo awe wooloka, sothene owo aapwetex'awe. Owo aahihokoloxa. Nto vairaly'awe siiso, Owo aahiruha mukatthe n'iviinyu, ekomunyawu. Khamunwerya omoona Ole aari Melikhiseteki uwo? Aari Muluku. Aaruuhale ekomunyawu, nuumala ekhotto.

<sup>65</sup> Vano nrowe nikhunle-tho, mwa Matewu 26:26, voowaakuva, noone etthu Yesu ohimmy'awe va mwaha wa yeeyo. Muliivuruni mwa Matewu, kapiitulu 26 ni eversiikulu 26, ninthuna nisome vakhani va. Vaareera, Matewu 26:26.

*Vano Yesu aahirowa ni yaawo nipuro nimosa naihaniwa Kolkota, Kolkota, ahiiso Ketisimani, (kiireke,) khwaahimeerya awiixutti awe, Mukilaathi va, miyo kinrowa iwe ovekela.*

<sup>66</sup> Kookupali wira kikuxale Yoolempwa yoovonyeya. Matewu, miloko miili-...versiikulu 26 ya kapiitulu 26. Akhala mutthu orina, akisomale, nyuwo mwa—nyuwo mwawerya ophwanya. Minuutu mmosa paahi. Ela ethoonyeryo yooreera va. Nkinthuna wira muhaleele. Hiyo nri va. Vale oophwanya, munna.

*Nto elyaaka, Yesu ahikuxa mukatthe, khureeriha, . . .*

Yaari exeeni iyo? Ekhotto yaahimala.

*. . . aahikawanya, khwaavaha awiixutti awe, khwira,  
Kuxakani, mukhuureke; ela erutthu aka.*

<sup>67</sup> Munnimoona Melikhiseteki uwo? Miyaakha imiya sene khalayi, okathi Owo aakumannyawe n'Abrahamu, vaamanly'aya ekhotto, Owo aahinvaha mukatthe n'iviinyu. Nto va Yesu onaavaha awiixutti, yaamanly'aya ekhotto Awe yoolipa, Owo aahaavaha mukatthe n'iviinyu. Nwehe. Nkawehani Orwa w'ohoolo.

*Vano owo aahikuxa muhasa, khu—khuxukhuru, ni  
khwaavaha, airaka, Nwuryeke ela othene anyu;*

*Tthiri ela ephome aka yo waataana wa naanaano,  
emwaraxeliwe. . . itampi ni oleveliwa wa itampi.*

*Masi kinooleelani wira, okhuma olelo nkinwurya-tho  
eviinyu ila, mpakha nihiku ninrow'aka owurya eviinyu  
esya ni nyuwo moomweneni mw'Atithi aka.*

<sup>68</sup> Hiyo nri mukhottoni vano. Hiyo nimmurowela munn'ihu omonre, yoole Muluku, ohinatthi opattuxiwa olumwenku, aamoonaly'awe khimutthomela Ekumi Ehinimala. Nto itthu sa molumwenkuni soomutthuka owo muhina muyuupuruni. Owo ookhuma khukela mmalokoni ni mixovo s'atthu, owo n'amwaar'awe, eettaka nno ni nno mphironi, anvuraka sikaro ni awuryaka ni maira, aphavelaka ophwanya murettele. Nto Erooho ya Kristu mwa hiyo, ntoko Eyo yaarow'aya okhala mw'Abrahamu, nookhuma nimurowelaka yoowo. Ni ikaruma sothene sa Muluku, Malaikha a Muluku aathukumana erukureryaka, ninrowa omuhokoloxa munn'ihu omonre.

<sup>69</sup> Nto ekhotto vookiserya yamala vale, ninookumana ni Melikhiseteki emaara ekina, attottopeliwe Muluku, Yoowo aamureerinhe Abrahamu iwe, ni khunvaha eparakha, ni khunvaha mukatthe n'iviinyu, opatthana. Nto ekhotto yamala, hiyo ninookumana ni Yoowo. Hiyo nikhanle alipa oomurithi natiri a Abrahamu, alipa oorithi vamosa ni Kristu Moomweneni, ninookumana ni Yoowo wookiseryani w'ephiro, ni ninookuxa mukatthe n'iviinyu, emaara ekina, ekhotto yamala.

<sup>70</sup> T'ani Melikhiseteki ula? "Ole ahaarina hata tiithi, ahaarina hata maama, khaarina hata epacerelo ya mahiku wala emalelo y'ekumi." Owo onrowa okhala Iwe wira avahe-tho ekomunyawu. Munniwa?

<sup>71</sup> Okathi omphiy'ahu, ohiyu kamosa-kamosa, okathi onkhal'ahu vamosa ni waakhela ekomunyawu mmatatani mw'arumeyi, nooniheryaka wira hiyo ninnaamini okhwa, ovithiwa, ni ohihimuwa wa Pwiya Yesu, wira ekuwo eyo, erutthu Awe yeeyo Owo aipinth'awe-mo, Muluku, hiyo ninkuxa, ntoko nthoonyeryo wira, "Hiyo nihookhwa wa itthu sa molumwenkuni,

ni nooyariwa vasya ni Erooho.” Nto nineetta ni Erutthu ya Kristu, alipa-oowaamini othene vamosa.

<sup>72</sup> Okathi ekhotto yuulupale emmal’aya, ni ninvenyaahu-tho ni Kristu, ninrowa okuxa ekomunyawu ni Yoowo Momweneni mwa Muluku, vasya; n’ulya erutthu, n’uwurya ephome ya iwuuva emaara ekina, Momweneni mwa Muluku. Oh! Ookhala Melikhiseteki. Ti Yoowo Owo aary’awe.

<sup>73</sup> Vano nrowe nisome-tho vakhani ya Yoowo va, nto eversiikulu 18.

*Nto Melikhiseteki mwene a oSalemi aahiruwa mukatthe n’wiinyu: . . . (Munniwa saana?) . . . ni owo aari namukuttho a Muluku muulupalexa.*

*Vano owo aahimureeriha, khwira, Mureerihiwe Abrahamu ni Muluku muulupalexa, mwaneene erimu n’ilapo ya vathi:*

*Nto owo aahimureeriha, . . . Nto owo aahimureeriha . . .*

*Attotopeliwe Muluku muulupalexa, yoowo aavaherenrye awanan’inyu mmatatani mwanyu. Vano owo aahinvaha ya namuloko ya itthu sothene.*

Owo aahimuliva sa namuloko Melikhiseteki. Abrahamu aahinvaha Owo ya namuloko ya itthu sothene.

<sup>74</sup> Vano kintthuna wira nwehe va okathi Paulo onkelel’awe ohoodo, avahaka mulipiheryo wa nisomi ninrwa vano.

*Vano mwene a oSotoma aahimuhimeerya Abrahamu wira, Mukivahe athu, nto nyuwo mukuxe mihakhu.*

Vano, mwene a oSotoma aahimiywa wira, “Vano, nyuwo mukivahe athu aka paahi, nto nyuwo mukuxe mihakhu.”

*Nto Abrahamu aahimwiirela mwene a oSotoma, miyo kihaavenxerya ntata naka APWIYA, Muluku aalupalexa, . . .*

*El Elyon, “mwaneene wirimu n’ilapo ya vathi,” vale.*

*. . . Muluku muulupalexa, mwaneene erimu n’ilapo ya vathi,*

*Wira nkinkuxa hata nliinya nnakhala mukhoyi wa ixapattho, . . .*

Owo khaarina ekampaanya yuulupale wira akuxe musurukhu. Owo aamutthuna paahi munn’awe aamonre.

*. . . ni wira nkinkuxa hat’ethu yawinyu, wira muhimiywa wira, koomuthaaciriha Abrahamu:*

*Ohiya iye amiravo silyiy’aya, ni epantte y’axilopwana yaaronwe ni miyo, . . .*

<sup>75</sup> Vano, kintthuna wira nwehe, Abrahamu aahimiywa wira, “Miyo nkinikuxa nliinya nnakhala mukhoyi wa ixapattho.”

Owo khaawanne ekhotto, wira aphwanye musurukhu munci-ene. Ni ikhotto s'ekeekhaixa khasiniiriwa ni itthunelo so wiiphenta. Ikhotto khasinwaniwa mwaha wa musurukhu. Ikhotto sinwaneliwa mwaha wa—mwaha wa itthunelo, mwaha wa mawoko. Atthu anwana ikhotto mwaha wa mawoko. Nto okathi Abrahamu okhumaly'awe wira amukuxe Lothi, owo khaaronwe mwaha wo wira aanisuwela wira aamuwerya waaxintta mwamwene ni okuxa mireerelo saya sothene, owo aarowenle niwoko na "omoopola munn'awe."

<sup>76</sup> Ni khula murumeyi onrummwa vathi va muupuxeryo wa Mwene a Wirimu, khonrowa orowa mwaha wa musurukhu; owo nnakhala khonrowa opaka ikereja suulupale, nnakhala khonrowa othuperya miromolelo. Owo onrowela paahi mwaha niwoko nimoso, nto nlo ti wii, "Omuhokoloxa munn'awe omonre." Hata wira omphwanya isentavo muloko mwa soovaha wala khomphwanya, eyo khenivirikana hata vakhani wa owo.

<sup>77</sup> Ntoko sinihimy'aka, "Ikhotto s'ekeekhai sinwaneliwa ni sinaakiheriwa mwaha wa mawoko nto kahi mwaha wa musurukhu." Nto alopwana n'athiyana anitakaniha ekereja ni orwa okereja, wira ekhale oosuweliwa, okhala wira aJone aniira mpantta wa weiwo, wala waakakhanya ekerej'aya okhuma ekereja ekhaani ekelaka ekereja yuulupale, muniira eyo mwaha wa etthunelo yo wiiphenta ni niwoko nooloka khanikhanle ottuli waya. Nyuwo mwaahaana otthuna weemela ohoolo w'ekhotto.

<sup>78</sup> Mutapernakulu mu, okathi itthu sineett'aya voovonyeya, nto nyuwo alopwana n'athiyana munoorthyawa murowe nipuro nikina, wala munoorowa mpakha manyakunyaku makhaani wala mulattu omala, yookhala etthu ehilonke ni musuwelelo anyu. Khweeli.

<sup>79</sup> Hiyo nookhalana elimalelo va. Hiyo nookhalana e—hiyo nookhalana enamuna va. Ekerej'ela enlipiheriwa vasulu va ikano sa Bibilia. Akhala mutthu mu ohiniira saana, ni munuupuwela wira khaniira, mmurowele mwalavule ni yoowo. Mwaahiweryeke omwaataaniha, vano mmukuxe munna mukina ni nyuwo, mmosa wala anli-tho. Owo aahaataaniheye nto, vano mwahimye okereja. Nto ekereja enoomwiikara, khuwaavotho opatthana ni yoowo. Ni Yesu ohimnye wira, "Sothene sinrow'anyu otaphula vathi va, Miyo kinootaphula Wirimu."

<sup>80</sup> Mwaha wa yeeyo murin'anyu mikattyamiho sinci-ene, okhala wira khamunthara ikano sa Bibilia. Vakhala wira mutthu mukereja onkumiherya enyakunyaku, wala etthu eneetta voohiloka, kuhiyo muteko anyu orowa omulavula mulopwan'owo wala muthiyan'owo. Ti muteko anyu orowa wa mulopwan'owo wala muthiyana, ni omuleela evonyeryo awe. Nto owo aahiwiweleleni, mmukuxe mukina ni nyuwo. Owo aahimwiiwe owo, vano ekereja enoomutaphula. Yesu ohimnye wira, "Etthu entaphul'anyu vathi va, Miyo kinootaphula



Wirimu. Etthu entthuk'anyu vathi va, Miyo kinootthuka Wirimu." Iwo owerya wa ekereja.

<sup>81</sup> Nno woohikhala khalayi, mulaleyi mmosa ooreera murima mpatthani aka, aahikhalana mmiravo mmosa, nto mmirav'owo aanirowaka okereja, ekerej'awe ene. Owo aahiphiyerya nipuro nimosaaapaceny'awe weettana mwali mmosa anvura sikaro ni aawurya ni eetta voohiloka. Mulaleyi khwira, "Vekeekhai, owo ti muteko awe." Mpatthani aka mmosa a vatthirima, ni mmiravo ooreera murima. Masi owo aarookhala othene oosveliwa ni mwali mmosa; ni owo aahitoko otheliwa, aahikhalana aana kamosa-kamosa, aiy'awe yaari akumi. Owo aanoova wira awo yaarowa okhalana . . . wira mmirav'ole ammathela. Tivo, munna aari othene ooriipiwa murima. Nto owo khukiirela, "Munna Branham, kintthuna wira murowe wa mmiravo aka ola *lexe-lexe*. Kintthuna wira mulavule ni yoowo."

<sup>82</sup> Miyo khwira, "Munna . . ." Kaahalela ohimya nsina nawe. "Nyuwo mookhalana enamuna yooreera. Muhikirume miyo. Vakhala wira mmirav'owo khoniiseettiha saana, ni ekereja yoomoona owo airaka voovonyeya, nto eyo etthu ya ekereja ovara mutek'ola. Eyo ti ya ekereja. Nto ekereja enoorowa khimuhimeerya."

<sup>83</sup> Tivo owo khimukuxa munna mmosa, khurowa khimuhimeerya. Vano owo khimunyemela munn'owo, khimuhimeerya wira owo aattharatthara mwah'awe, wira owo aahaana wira siiso. Owo khimukuxa munna mukina, anli akina, matiyaakono manli khurowa khimuleela mmirav'owo. Owo khaathuna wiiwelela. Awo khuhimeerya ekereja. Nto owo khaarwiye ohiyu munci-ene, wira aataanihiwe n'ekereja numala etampi awe ohimmwa ohoolo wa ekereja. Vano, ekereja khimutaphula.

<sup>84</sup> Nto voophiyaka mweeri okhuma vaavo owo aahiwereiwa eretta ya masasu, nto meetiku khwira, "Khuuvo hata nrromelo mulaponi wa owo okhala mukumi." Vano aahipuruleya atthikaka. Muluku onnisuwela moota wo wira.

<sup>85</sup> Hiyo nineererya wira mmansihu, "Oh, nyuwo mwaahaana oomomola *Lexe ni lexe* mukereja. Nyuwo mwaahaana wira *ela, ele, wala ekina*." Muhiira mpantte anyu ntoko ekereja wa yeeyo? Nyuwo muri vo. Eyo t'inamuna yo waahokoloxa epuruleyaka, mwaavahererye xetwani emaara emosa.

<sup>86</sup> Exeeni Paulo ohimmy'awe mwaha wa mulopwan'ola iwe aarupa n'ame awe oomuphwanya? Awo khiyaawerya omwaataaniha. Khwira, "Munvahererye xetwani." Nwehe etthu enkhumelela. Nto epaphelo yootharelana Paulo aalempy'awe, mulopwan'ola aahiilokiherya. Vekeekhai. Muluku oohaana enamuna yo wira ithu iya, hiyo natthara-ru malamulo Awe paahi.

<sup>87</sup> Yakhala etthu enivonyeya mukereja, yakhala eriyari ya muthukumano, khula mmosa a nyuwo axinna. Yakhala nikhuru na matiyaakono, mmosa a nyuwo matiyaakono khoneetta saana, matiyaakono akina arwe mukhalane muthukumano, mphavele omwaataaniha munn'owo, mmuleele etthu eniir'awe; wala mmosa a nyuwo mamempuru, munakhaleru pani. Vano ehaana oruhiwa wa yoowo. Owo aahiire, weso murwe mmuleele pastore. Vano, owo onootaphuliwa mukereja, vano nto akhale ntoko pakawu ni mulipa-ootheka. Vano mwaawehe Apwiya orowa ovara muteko mwa yoowo. Moone, owo p'ukathi owo oniitthikel'awe mmansawe. Owo p'ukathi onrow'awe okela apuruleyaka. Masi hiyo nineererya wira mmansihu, moosuwela, weererya wira e . . . sothene enamuna vaatthuney'aya hiyo wira, vano, khanimphwanya mureerelo.

<sup>88</sup> Vano, Melikhiseteki ula, Mwene a oSalemi, Mukhulupale, Namukuttho Muulupalexa, aahikumana ni Abrahamu khimureeriha. Ni khunvaha Owo sa namuloko sawe, Abrahamu aahinvaha. Nto Owo aari Mwene a oSalemi. Ni Owo aahiruuha mukatthe n'iviinyu, ekomunyawu, nto khunvaha Abrahamu numala ekhotto, vaamanly'aya axilopwana woopoliwa.

<sup>89</sup> Vano, "Ikhotto sothene," ntoko sinihimy'aka, "siniwaneliwa mawoko." Vano, nyuwo mwakhalana ekhotto yaamukhaani mukereja, nihaana okhala niwoko nooloka. Muhaana okhala nwanelaka etthu yooloka. Nto khula mempuru a mukereja ohaanaa wira yeeyo. Vano, mwiixuttih'ola ti wa ekereja. Ti yeeyo nikhalenly'ahu va. Ti yeeyo keemelenly'aka va. Ti yeeyo akhalenly'aya Masu a Muluku, t'a ekereja.

<sup>90</sup> Muhiiye nnakhala etthu okhottiherya ekereja ela. Yakhottiherya-ru, nyuwo mootheka, khula mmosa a nyuwo. Ni nyuwo, mukereja mwanyu soovirikana, etthu yaakhalaka yoovonyeya mukereja mwanyu, mootheka, okhala wira nyuwo mwa mulipa-oowehaxaxa a ekereja ele. Kahi ya pastore. Kahi ya nikhuru na matiyaakono. Eyo ti yawinyu nyuwo, nyuwo mutthu oomeekha, omurowela munn'owo wona sinto munoowerya omwaataaniha. Vaahikhale, weso mwaakuxe aili wala araru ni nyuwo, nto mutthike. Owo aahiwelele yeeyo, muhimeerye ekereja. Vano owo onimwiikariwa Momweneni mwa Muluku. Muluku ohimmye wira, "Nyuwo mwamoomola owo nno, Miyi kinoomoomola Nno, vakhala-ru wira mootthariha nlamulo nla." Vano Owo onoomutaphulela xetwani wira etekiwe . . . epwetexiwe erutthu awe. Nto vo owo onootthika. Ti yeeyo. Eyo t'inamuna y'omwiiriha owo otthika. Owo akhala mwaana a Muluku, owo onootthika. Owo aahikhale, vano—vano, owo onookelela ohoolo, vano nto xetwani onoomuroiha mpakha nipuro nawe Noohimala.

<sup>91</sup> Vano, itthunelo sa yeeyo. Nyuwo mwamukuxerya-ru yeeyo paahi mutthu, vano eyo ti yoovirikana. Masi, mutth'uwo akhala-ru ootheka! Nto Lothi aaroorowa wu ni khutthikela

ottuli, onamwi aari muHeperi. Owo aaroorowa wu ni aarootthikela ottuli. Owo aari mwa mahala, masi aaroomora mwa yaawo. Nto okathi owo okhummy'awe...Ni Lothi—Lothi aahoopowa. Muhuupuweleke wira Lothi khooponwe. Owo aahoopowa. Okhala wira, okathi wothene owo waary'awe nipuro noovonyeya, Bibilia ohimmye, wira, "Itampi s'oSotoma saanihaaxa munepa awe wa xariya khula nihiku." Vano, erutthu awe yiira etthu emosa. Nto emalelo awe yaari exeeni? Owo aahiruaha otakhaliwa wunci-ene. Amwaar'awe yaathatunwe nripu na maakha. Owo aahaayara aana n'an'awe axithiyana. Tivo, munoowerya woona otakhaliwa xeeni eyo yaaruuhaly'aya, okhala wira owo aahimora mwa mahala ni khaatthikenletho wiilokiha mmansawe. Nto Muluku aahaana omukumiha mulaponi.

<sup>92</sup> Masi, nnakhala vo, owo aari munna aamonre, ni Abrahamu aahiira sothene aawery'awe wira wii amuhokoloxe-tho. Nto Erooho yaari mw'Abrahamu, ti Erooho ya Kristu eri mukereja olelo. Voohicala etthu munna iiraly'awe, munimwiira sothene sinwery'anyu wira mmuhokoloxerye mopatthanani mwa Kristu tho. Voohicala etthu owo iiraly'awe, nyuwo munimwiilipiha.

<sup>93</sup> Vano, ninthuna niwehe va emaara ekina, okathi onrow'ahu ni nisomi nenla na Melikhiseteki ula, Namukuttho ola muulupale a oSalemi, ni mwaneene Erimu n'ilapo ya vathi. Vano, ory'ene oopacerya:

*Oohikhalana tiithi, oohikhalana maama, nnakhala nloko, nnakhala oohikhalana epacerelo ya mahiku, hata emalelo y'ekumi; masi aakhalihiwe oolikana ni Mwaana a Muluku; onnikhala namukuttho mahiku othene.*

Vano nwehe. Owo khaari Mwaana a Muluku, Owo aari Muluku a Mwaana. Owo khaari Mwaana a Muluku, Melikhiseteki khaari, masi Owo aari Tithi a Mwaana a Muluku.

<sup>94</sup> Vano, erutthu ila Owo aarin'awe, Owo aaroopattuxa. Eyo khiyaaruuriwe eviraka mwa muthiyana. Tivo n'erutthu ile yoopattuxiwa, Owo khaakhanle...Erutthu emosa Owo aapakaly'awe, Mwaneene, wira aisuupulule Mwaneene.

"Khaavo onwerya omoona Muluku hata okathi mmosa. Muluku eroohoo." Maitho ankhwa khanoona itthu iyo, voohikhala wira eri mwa mukhalelo ntoko Nlumi na Mooro, wala etthu p'itthu yaary'aya, wala mwa mukhalelo wa ookhala mmosa awo yaamoonaly'aya ni yoowoona. Masi e...Muluku ohaana wiisuupulula Mmansawe mwa enamuna emosa. Nto Muluku aahiisuupulula Mmansawe w'Abrahamu, mwa mukhalelo wa mutthu. Owo aahiisuupulula Mmansawe wa Moise, mwa mukhalelo wa mutthu. Owo aahiisuupulula Mmansawe w'ana a Isarayeli, mwa mukhalelo wa Nlumi na Mooro. Owo aahiisuupulula Mmansawe wa Yohani Mpatisa, mwa mukhalelo

w'epompa. Moone, Owo aahiisuupulula Mmansawe mwa mukhalelo seiyo.

Okathi Owo aaisuupulul'awe Mmansawe mwa mukhalelo wa Mutthu, ntoko Mwene a oSalemi; a oYerusalemu; kahi wa Yerusalemu a elapo ya vathi, masi Yerusalemu a Wirimu. Owo aahiisuupulula Mmansawe mwa mukhalelo yoowo. Owo aakhalihawe "oolikana ni" Mwaana a Muluku.

<sup>95</sup> Vano, Mwaana a Muluku aahaana orwa aviraka mwa muthiyana, wira apattuxiwe va; ni mmirimani mwa muthiyana, okhala wira ni etthu yeeyo emosaru ohoorwa okhwa.

<sup>96</sup> Nto Owo khaakhanle orwaaka mwa opattuxiwa ntoko Muluku siiraly'awe wopaceryani. Okathi Muluku ampank'awe mutthu wopaceryani, muthiyana khaarina nnaata n'iyoyi. Muluku iirale paahi, "Akhale," nto mutthu khurwa okhuma vatthayani. Owo aaroomwiihana, woohikhala hata muthiyana wira akhale nnaata ni yeeyo. Masi, muthiyana, owo nto aari mwa mulopwana.

<sup>97</sup> Nto Muluku aamukuminhe muthiyana mpararini mw'Atamu. Eyo ekeekhahi? Vano nto muthiyana khurwa khuimukumiherya mutthu mwaha w'ekhapa. Vano enamuna emosa paahi Muluku aakhanly'awe wiiraka. . . Owo khaakhanle oovolowaka muteyofaniiyani mme. Owo khaakhanle orwaaka ntoko Melikhiseteki. Owo aahaana orwa ntoko Mutthu, ni Owo aahaana orwa aviraka mwa muthiyana. "Osuulu anyu ononyakela muru w'enowa, ni muru awe onooluma nnawo Nanyu." Munniiwa saana? Muluku aahaana orwa aviraka mwa muthiyana; vano Owo aahiira, okathi Owo aakhal'awe mw'erutthuni mw'Awe ya Mwan'Awe, Kristu Yesu. "Muluku aari mwa Kristu, aataanihaka olumwenku ni Yoowo." Ni Owo aahivaha Ephome Awe Mwaneene ntoko mukuttho. Ni oovaha Ekumi Awe, wira aviraka evirelo ya mookhwaani, Owo awerye owoopolani nyuwo wa Ekumi Ehinimala.

<sup>98</sup> Tivo Muluku aahirwa nto, Owo aahiikhalihawi "oolikana ni" Mwaana a Muluku. Munnona? Owo aari Mutthu aakhalihawe *ntoko* Mwaana a Muluku. Vano, Owo khaakhanle okhalaka Mwaana a Muluku, okhala wira Mutth'ula t'Ohimala.

<sup>99</sup> Mwaana a Muluku aahikhalana epacerelo, Owo aahikhalana emalelo. Owo aahikhalana o—okathi w'oyariwa Wawe, Owo aahikhalana okathi w'okhwa Wawe. Owo aahikhalana soopiili epacerelo ni emalelo. Owo aahikhalana oowaili tiithi ni maama.

<sup>100</sup> Mutth'ula khaarina hata tiithi nnakhala maama, epacerelo wala emalelo y'okathi. Masi Owo aakhalihawe, Mutth'ula, Melikhiseteki, aakhalihawe *ntoko* Mwaana a Muluku.

<sup>101</sup> Vano, Mwaana a Muluku, okathi Owo aarwiiv'awe mulaponi, mwa mukhalelo wa muthiyana, ahiiso, aviraka mwa muthiyana, mwa mukhalelo wa mutthu, ni khwiiwiwa, khuhihimuwa mmurotoni mwaya, aahihimunwe wira nikhalihawe anaxariya,

vano Owo onkhala voohimala-tho. Nto vakhala-ru wira erutthu ile ennikhala, ni hiyo ninnikhala. Nto okhala wira Owo oohihimuwa mutthayani, hiyo ninoohihimuxiwa oolikana ni Yoowo. Vo ti vari wahala a Ehapari yooreera. Nittotopeliwe Nsina n'Apwiya. Kahi Malaikha, kahi ookhala a erimu, kahi nikuttha na mapururu athukumanne, masi alopwana n'athiyana, amen, ooweemela oolikana ni Yoowo. Ayo, mulopwana.

<sup>102</sup> Ntoko sinihimyak'aka imaara sinci-ene, kinnihimya-tho va okathi ula. Enkhala ntoko yooreerela. Miyo kaamuxamula, maihi ala oophiyaka mathanu wala mathanu na mosa kihalann'aka. Nto amwaar'aka khwira, "Billy, moopacerya okhalana ntari."

<sup>103</sup> Miyo khwira, "Masi khanikipweteiye hata nimosa a yaawo."

<sup>104</sup> Awo khwira, "Ari vayi?"

<sup>105</sup> Miyo khwira, "Mukileele nipuro yaary'aya kihinatthi okhalana, kinimooleelani nipuro awo ankilipelel'aya." Ti yeeyo.

<sup>106</sup> Miyo kaanikhalaka na—nakhotto, mulipa-oowana. Miyo kaari a ikuru ni muulupale. Nto kaanoona wira, mwaakihelenle ekerej'ela ottuli waka, kaamweetta mphironi ni yeeyo. Miyo kinimooleelani, kaavenyaka khula voosiisu vano, kinnisuwela wira sookhala iyaakha miloko mixexe n'itthu sivinre. Munnona? Miyo nkihiyo ele kaary'aka. Miyo kinoovonya, khula nihiku. Kaawehaka matat'aka ni wuupuwela, "Nkawehani va. Ahe, kinimuuluvala." Kinooweha makhat'aka. Kinnoona wira koophwanya orulela vancie-ene. Kaaniwaraka musako wa miloko miili ni thanu na tthaaru. Kinwara wa miloko miraru vano. Moone, kinimuuluvala, oneneva, kinoovukuwa.

<sup>107</sup> Exeeni iyo? Miyo kinlya etthu emosaru yeeyo kaalyaak'aka. Miyo kinikhala ooreerela ni vooreera ovikana saakhalak'aka, etthu emosaru. Masi Muluku oolamulela okathi wa miyo, ni kihaana waakhela. Masi muupuwelo woottotopeliwa t'ula, wira, nihiku nlo, Owo onookihihimuxa-tho. Ni sothene kaary'aka okathi waary'aka iyaakha miloko miili ni thanu, kinookhala-tho mahiku othene. Amen. Eyo eri vo. Xeeni okihaaxaka wunnuwa? Miyo kinoomuxintta xetwani mwa yeeyo mwa miyaakha ni miyaakha, kisuwelaka ela, wira kinnimwaamini Owo. Ehuhu ila yaamukhaani, etthu yookhuvaya paahi, khula enamuna. Vaakhanle wira naakhala miloko miili vaara vararu ni muloko paahi, miyaakha miloko mithanu na miili, okathi nilaiheriw'ahu, exeeni—exeeni iyo woohikhala otakhaliwa ni wiisinliha? Exeeni iyo? Mwaamutthuna opatili emp'ela ya ikwerere n'itthu ile yoovuwa iwe?

<sup>108</sup> Vano, nittotopeliwe Nsina n'Apwiya! Etthu emosa muhina mwaka yaahikumana ni Melikhiseteki uwo nihiku nimosa, nto Owo aahilavula murettele ni miyo vano Owo khukivaha Ekumi

Ehiminala. Nto ekumi ila khenihimya hat'etthu woohikhala empa wira mwa yeeyo kilaleerye Ehapari yooreera. Miyo kinihimya ela n'ixariya yothene, ni aBibilia ala aili ookhunliwa ari ohoolo waka. Vaakhanle wira Muluku aka aahimaliha ni miyo olaleya Ehapari yooreera, ni khuhinawerya onvarela-tho etthu Yoowo, an'aka yaakhanle oowunnuwa voophiyerya wira yiikhapeleleke mmansaya, ni Owo onatthuna okikuxa naanaano va, "Amen," eyo ennimaliha mwaha. Ayo, mulopwana.

<sup>109</sup> Envirikana exeeni vakhala wira kirina miyaakha miloko mithanu na miraru wala vakhala wira kirina miloko miili? Miyo kiri va paahi mwaha w'etthu emosa: wira kaarumeele Apwiya. Ti yeeyo tu. Vakhala wira nlelo kinniwerya olaleya Ehapari yooreera ntoko siniir'aka vano, kakhalana-ru miloko mithanu na miraru, envirikana exeeni wira kirina miloko mixexe wala miloko mithanu na miraru? Aakhala axilopwana anci-ene a miyaakha miloko mithanu na miraru ohiy'ula. Ni aakhala aana anci-ene anrowa okhwa, okathi mulopwana a miyaakha miloko mithanu na miraru onrow'awe okhala waavikana anci-ene aya. Evirikanelo zeeni iyo eniir'aya? Ti mawoko anyu, malamulo anyu, ni hiyo nri va wira nimurumeele Pwiya Yesu. Ti yeeyo tu.

<sup>110</sup> Nisuwelaka ela, wira, "Ekumi ila nikupetthe mutthu onihimy'awe; yaatonko okhala, vano nto khekhanle." Masi hiyo nakhalanaru Ekumi Ehiminala, Muluku oolaiherya wira Owo onoonihimuxa-tho. Ni ninookhalana opatthana ni Yoowo mahiku yamala vale, ni okathi Owo oniir'awe, "Nvoloweke moopuhani mw'Apwiya, mutthokiheriw'anyu okhuma opattuxiwaka-ru olumwenku."

<sup>111</sup> Vano evirikanne exeeni nno, vakhala wira nookhalana etthu wala khanirina? Hata nikhalaka mmiravo wala hata nikhalaka oowuuluwala, evirikanne exeeni? Etthu yuulupalexa, nyuwu moolikana wira mwakumane ni Yoowo? Munnimphenta Yoowo? Munooowerya omurumeela Yoowo? Mootumiha itthu sa molumwenkuni? Mookumana ni Melikhiseteki okhuma vamanly'aya ekhotto?

<sup>112</sup> Attotopeliwe Muluku! Kirine-ene iyaakha soophiyaka miloko miili ni mmosa, miyo kaari, nto nihiku nimoso kaahikhalana ekhotto *n'ila*, *ele*, ni *ekina*. Nkaawerya othanla sinto kaatthuna okhala namawana, wala sinto kaatthuna okhala namiraakho, wala namaxaya, etthu kaatthun'aka okhala. Masi kaahikumana ni Melikhiseteki, nto Owo khukivaha ekomunyawu, nto okhuma vaavo yaahimaliheriwa wa mahiku othene. Aleluya! Koorowa epantte Awe. Kinnikhalaka kitthapaka mphironi. Nto waphiya wookiseryani w'ephiro, ni okhwa onakilipela wiitho, enamuna sinoon'aka vano, nkinkhalakhala koovaka. Kinimweetta, kintthuna keette wiitho waya, kisuwelaka ela, wira kinnimusuwela Owo Yoole omulampe natiri, ti yeeyo, wira kinnimusuwela Owo mwa owerya w'ohihimuwa Wawe. Owo aihanaru eriyari y'alipa

ookhwa, miyo kinookhuma eriyari aya. Ti yeeyo, omusuwela Owo mwa owerya w'ohihimuwa Wawe. Envirikana exeeni, sinto kihuuluvala wala sinto ka mmiravo? Sinto ka mukhaani wala sinto ka muulupale? Sinto kiroovona wala sinto kiroovoliwa etala? Sinto kookhalana opuro wo wummaathi wala sinto nkirina?

113 “Axipalame aakhalana ipuru, khwatte ookhalana muttupha, masi Mwaana a mutthu khorina nipuro n'omumuliha muru Awe,” masi Owo aari Mwene a Movuwani.

114 Hiyo na mamwene ni anamukuttho ohiy'ula. Envirikana exeeni sinto nookhalana wala sinto khanikhalanne? Vakhalaru wira nookhalana Muluku, hiyo nootepaxa oxintta. Hiyo nootepaxa oxintta. Hiyo nikilanthi Ohoolo wa Muluku, mwa opatthana wa Erooho Yoowaarya, naakhelaka ekomunyawu ya Muroohoni mmatatani mwa Ole ohimnye wira, “Miyo kaari Ole aakhwiye, ni kinkhala-tho, ni Miyo ka mukumi voohimala.” Nikilanthi vamosa mapuro a Wirimu mwa Kristu Yesu. Oh, nntotopeliwe Nsina Nawe Noowaarya! Envirikana exeeni?

Eheema wala murapattha, kaarowa  
ovelavelela-ni?

Awo ankitekela empa ya mwene Iwe!

Sa arupi ni maluku oowaarya, ni eparatha ni  
eweero,

Macucu Aya t'osarya, Awo arina mihakhu  
sihinaalakeya.

115 Miyo kaahikumana ni Yoowo nihiku nimosa kikhumaka okhottoni. Miyo kaahihiya sooxintta saka vathi. Miyo nkinawane ekhotto okhuma okathi yoowo; Owo t'onkiwanela seiyo miyo. Miyo kimmumula paahi mwa natiri Awe, kisuwelaka ela, wira miyo kinnimusuwela Owo mwa owerya wo ohihimuwa Wawe. Eyo ti yothene entthuneya. Exeeni-tho entthuneya?

116 Niireke exeeni? Xeeni weteteyaka wira munoowerya wuncererya orakama w'erutthu anyu? Muncala exeeni vakhala wira maihi anyu t'on yokotowa, wala vakhala wira mookhalana wala nnari? Envirikana exeeni? Vakhala wira murimunnuwa, vakhala wira murimuuluvala, vakhala wira muroomora makhata, vakhala wira khammonre, exeeni envirikana? Amen. Ela ti y'okathi vakhani paahi, okathi vakhani, masi Ele ti voohimala ni voohimala. Nto okathi woohaalikeleya onivir'aya, okathi onivir'aya, nyuwo khamunrowa orukunuwa, ni munoovira okathi Awe wa mahiku othene Ohinimala. Evirikanelo xeeni eniir'aya?

117 Kinnitthapa saana okumana ni Yoowo. Kinnitthapa saana Owo okivaha ekomunyawu, nihiku nimosa, Melikhiseteki mmosaru yoowo aakumanne ni Abrahamu akhumaka waawiiv'awe mamwene. Vekeekhai. “Muluku a Wirimu,” *El Elyon*; “MIYO KOOKHALA” muulupale, kahi Miyo

kaakhanle; MIYO KOOKHALA, okathi wa naanaano. “Ni Owo aahimureeriha.”

118 Nwiriyaane va vakhani-tho, wira niwerye wiiwa oratta-ene vakhani nisomi nene vamosa. Vano versiikulu 4.

*Vano mutthokelele moota mutth’ula aary’awe muulupale, . . .*

Miyo kinuupuwela yeeyo paahi, nave. “Mutthokelele moota Mutth’ula aary’awe muulupale.” Owo t’onvikana Mwaana a Muluku. Mwaana a Muluku aahikhalana tiithi ni maama; Owo khaarina. Mwaana a Muluku aahikhalana epacerelo ya okathi ni emalelo y’okathi; Owo khaarina. Aari Pani uwo? Owo aari Tithi a Mwaana. Ti Yoowo Owo aary’awe.

*. . . mutthokelele moota mutth’ula aary’awe muulupale, wa . . . hata tiithi Abrahamu aahinvaha ya namuloko ya itthu sothene.*

119 Vano nwiriyaane oratteene.

*Ni vekeekhaiyi ale ari aana a Levi, yaawo anaakhela muteko w’enamukuttho, aakhalana . . . yooruma yo waakhela sa namuloko s’atthu vootthariha ikano, eyo ti wii, s’axinn’aya vanamwi awo ekhumme muyuununi mwa Abrahamu:*

120 Vano nwehe ela mwaatthunaka woona etthu.

*Masi ole osuulu awe ahaari wa . . . wa yaawo aahaakhela sa namuloko sa Abrahamu, khumureeriha ole aarina natiri.*

121 Abrahamu aahikhalana natiri, nto Mutth’ula aahimureeriha Abrahamu yoowo aarina natiri. Aari Pani ula? Aana a Levi yaanaaliva sa namuloko axinna aya wala . . . Axinn’aya yaanaaliva sa namuloko awo. Awo yaahikhalanasa yooruma ya Apwiya wira ekuxeke ya namuloko sa iye axinn’aya yaapak’aya, wira ekhaleke yoolya aya, okhala wira awo yaari onamukuttho. Vano, eyo ennikumiha onamukuttho wa Melikhiseteki, ntoko sinihimy’anyu, vaavo vo. Ti yeeyo. Masi Mutth’ula . . . Hata ole aarina natiri, mutthu muulupalexa mulaponi, Abrahamu, aahikumana ni Mutth’ula ni aahimuliva sa namuloko Yoowo. [Nipuro vahiiitthu mufiitani—Mol.] Owo aahaana okhala muulupalexa.

122 Nwiriyaane.

*Ni khivanaanyiheriwa nnakhala wira ole ori mukhaani tonreerihiwa n’ule ori muulupale.*

Vekeekhai. Nkanweheni Ole okhanly’awe.

*Nto va atthu ankhwa t’anaakhela sa namuloko; . . .*

Owo ti onamukuttho vootthariha anamukuttho ni alaleyi, ni sikina. Atthu anaakhela sa namuloko, ankhwa. Munnona?



*...masi va owo aahaakhela, ole onihimmwa wira onkhala.*

123 Exeeni mutthu aarowaawe okuxaka sa namuloko, vaakhala wira aahikhalana...Vakhala wira owo khanayariweke, ni khonrowa okhwa, ni aakhanle okhuma woopaceryani mpakha woomalelani, ni—ni khonakhalaneke tiithi wala maama wala osuulu, ni aarina Irimu sothene ni elapo ya vathi ni sothene memmo, xeeni aarowaawe okuxaka ya namuloko? Xeeni owo aarowaawe onvekela Abrahamu wira alive sa namuloko? Munnoona ekhalenly'aya etthu yookhanyerereya oliva sa namuloko? Oliva sa namuloko ti yoolikana. Khula muKristu ohaana oliva ya namuloko. Ti yeeyo. Khenakhalakhale erukunxiwaka.

124 Vano:

*Ni ntoko sinihim'yaka wira, hata Levi, yoowo aakhela ya namuloko, aahiliva sa namuloko mw'Abrahamu.*

125 Vano, oh, va yookhala etthu.

*Okhala wira owo nlelo aari muyuununi mwa atith'awe, okathi Melikhiseteki aakumann'awe ni yoowo.*

126 Exeeni? Levi? Abrahamu aari apaap'aya apwaapwu awe Levi. Ni Bibilia oohimya va, wira, "Levi aahiliva sa namuloko okathi waary'awe muyuununi mwa Abrahamu." Maloko maxexe owo ahinatthi orwa elapo ya vathi, owo aanimuliva sa namuloko Melikhiseteki. Nittottopeliwe Nsina n'Apwiya!

127 Nto, nyuwo muhinwerya waamini otthommwa, wala otthokiheriwa khalayi ene; nto va, maloko maxexe Levi ahinatthi hata okhuma muyuununi mwa Abrahamu, aamuliva sa namuloko Melikhiseteki. Kaaniththuna nikhalanne-ene okathi w'othokosa yeela mwa Soolempwa.

128 Nyuwo mwamukuxa-ru p'uhimya wene mwa Yereimiya 1:4, Muluku iirale, "Miyu koosuwenleni muhinatthi hata wuupeya mmirimani mw'ame anyu. Nto Miyu kihooreerihani khookhalihani profeta a maloko." Vano exeeni mukhanly'anyu ohimiyaka wira muhiira? Exeeni kikhany'aka ohimiyaka wira kihira? Ti Muluku onooniherya omoriwa ikharari. Muluku oonisuwela hiyo ohinatthi opattuxiwa olumwenku.

129 Owo khandthuna wira hata mutthu apweteye. Vekeekhai nnari. Masi vakhala wira Owo Mulukuu, Owo aahisuwela t'ani aarowa woopowa ni t'ani ahaarowa woopowa, nanso Owo khaasuwela hat'etthu. Vakhala wira Owo khaasuwela... Vakhala wira owo khaasuwela ti pani aarowa okela Mookuxiwani, ohinatthi opakiwa olumwenku, weeso Owo kahi Muluku. Owo akhala Oohimala, Owo aaha...Owo aahisuwela khula eyaasu, khula ephepele, khula etthupo, khula ttekenya, aarowa okhalakhala akhalaka mulaponi, elapo ehinatthi

opakiwa. Ti yeeyo. Owo aahisuwela itthu sothene. Ohinatthi opattuxiwa olumwenku, Owo aahinisuwela. Bibilia ohimmye, wira, “Owo oonisuwela khunitthoma.”

<sup>130</sup> Nrowe nilakiherye yeela emaara emosa paahi. Nrowe nitthikele mwa aEfeso, kapiitulu 1. Ekapiitulu 5- . . . Ekapiitulu 1 y’aEfeso, okathi vakhani paahi. Kintthuna kisome va minuutu mmosa paahi, wira nyuwo nwerye osuwela saana wira kehiyo etthu paahi kineereryaka wooleelani. Eyo etthu Muluku omphavel’awe wooleelani. Munnona? Vano nwiriyane ela, saana ene, kapiitulu 1 y’aEfeso.

*Paulo, murummwa a Yesu Kristu vootthuna wa Muluku, . . .*

Mutthu mmosaru olempe ewarakha y’aHeperi, t’onlepa ewarakha ela.

*. . . w’atthu ooreera murima . . .*

Ela kahi y’atthu oohaamini, masi w’atthu ooreera murima, ale ooreerih- . . . ale oowaarya.

*. . . anikhala wEfeso, ni oororomeleya mwa Kristu Yesu:*

*Mahala akhale ni nyuwo, ni murettele, wa Muluku Tith’ihu, ni wa Pwiya Yesu Kristu.*

*Attotopeliwe Muluku ni Tiith’awe Pwiya’ahu Yesu Kristu, yoowo onireerinhe ni mareeriho othene a muroohoni osulu wirimu . . .*

“Ntoko Owo . . .” Vano, nwiriyane oratteene vano, eversiikulu 4.

*Okhala wira owo oonithanla hiyo mwa yoowo ohinatthi opattuxiwa olumwenku, . . .*

T’ani akhanle “hiyo” vo? Ekereja.

*. . . owo oonithanla hiyo mwa yoowo (Kristu) ohinatthi opattuxiwa, elapo, wira nikhale ooreera murima ni oohittheka vamaithoni vawe moophentani:*

*Oonitthoma okhuma khalayi wira nikhale aana mwa Yesu Kristu mwa yoowo, ntoko Yoowo Mwaneene suupuwenly’awe n’utthuna wawe,*

<sup>131</sup> T’ani iirale? Muluku t’oirale. Muluku aahisuwela okhuma woopaceryani t’ani aarowa woopowa ni t’ani ahaarowa woopowa. Vekeekhai, Owo khaatthuna wira hata mmosa apweteye. Masi Owo khaamurumme Yesu mu wira oone paahi vakhala wira nyuwo mwaamu—mwaamwiira ntoko, “Ahe, Yesu oohaawa, kinnimoonela othunku Yoowo. Khino vaamureerela miyo woopowa ni waakhulela yeeyo.” Nnari, mulopwana.

<sup>132</sup> Muluku aahisuwela woopaceryani t’ani aarowa ni t’ani ahaarowa. Vano, tivo, Owo aahisuwela wira akina yaamurowa woopowa, tivo Owo khimuruma Yesu wira akhale mukuttho

w'ottipihā itampi w'ale Owo aasuwenly'awe khalayi ene. "Okhala wira ale Owo aasuwenly'awe khalayi ene, Owo oowiihana. Nto ale Owo owiihann'awe, Owo ohaakhaliha anaxariya. Ni ale Owo aakhalinhaawe anaxariya, Owo (okathi ovinre) ohaavuwihā." Eyo vo.

133 Tivo khamuhiyo nyuwo muniisuka mmansinyu, ti mahala a Muluku anoosukani. Nyuwo khamwiisooponle, wala hat'etthu khamwiirale wira mphwanele woopowa. Ti mahala a Muluku awooponleni. Mahala a Muluku t'awiihanneni. Osuwela wa Muluku khalayi ene waahoosuwelani. Owo aahisuwela wira mwaarowa okhala mukereja mu ohiy'ula, ohinatthi okhalihwiwa mulipiheryo w'olumwenku, vakhala wira Owo t'ohimala. Owo aahikhale, Owo kahi Muluku. Vakhala wira Owo aanisuwela itthu sothene, Owo aari Muluku. Vakhala wira Owo khaasuwela itthu sothene, Owo khaari Muluku. Owo aari Muluku Oowerya sothene, Owo onniwerya wira itthu sothene. Aahiweryeke wira itthu sothene, Owo kahi Muluku Oowerya sothene. Eyo eri vo.

134 Vano muniwerya sayi ohimya wira eyo etthu mwaakhanly'anyu wiiraka? Kehiyo hat'etthu mukhanly'anyu wiiraka. Ti ophenta wa Muluku ni mahala wa nyuwo, hata mukhanly'anyu va. Khiivo etthu mwaakhanly'anyu wiiraka, Muluku owiihanneni ni mahala Awe; nyuwo khuwiriya, khwiwa, khukupali.

135 "Ahe," nyuwo muniira, "Munna Branham, eyo ennikhaliha vootepa otaphuwa." Vekeekhai ennikhaliha. Nyuwo mootaphuwa. "Ahe, mutth'uwō onniwerya wira etthu p'itthu onttun'awe." Vekeekhai. Miyo kweekwe kinniira etthu entthun'aka wira. Masi mwaari muKristu, khamuntthuna wira etthu yoovonyeya.

136 Ookhala mwali mmosa okilante ottuli iwo ohiy'ula, mwaar'aka. Miyo kinnimphenta ni sothene siri mwa miyo. Nto kaasuwenle wira kaamuwerya okhuma ni muthiyana mukina voohikumela etthu, n'urowa omulela, ni wira, "Meda, miyo koovonya," nyuwo munuupuwela wira kaamwiira? Vakhala wira kinnimphenta oratteene, nkinrowa wira. Ti yeeyo.

137 Vano, ankhī miyo kaahimye wira, "Oh, nkikhanle wira. Okhala wira, kinimooleelani mwah'aya. Owo aamukimwalana, ni miyo kookhalana... Oh, miyo ka mulaleyi. Munnoona etthu yaarow'aya oruuha? Eyo yaamukikumiha vapulpitu, vaari wira awo yaamukimwalana. 'Mulopwana oomwalaniwa, oh!' Miyo kihaana anamwane araru; nkaawerya wuupuwela eyo. Masi, mmiravo, miyo...?" Ahe, vakhala wira ti siiso ery'aya, nlelo nyuwo mwa ootthariha ikano. Kahi mulipiheryo wa ikano kaathelenly'aka. Kahi mwaha wa mulipiheryo wa ikano miyo onkhal'aka ooromeleya w'awo. Okhala wira kinnaaphenta. Nkirina wira hat'etthu. Kiniira vootthuna

okhala wira mwaha w'ophentana. Nto nyuwo mwaaphentaka amwaar'inyu, munimwiira etthu emosaru.

138 Nto nyuwo mwaamphentaka amwaar'inyu siiso, ni ophenta *fileo*, mwaarowa omwiirela exeeni Kristu ni ophenta *agapao*, okhanle wa ikuru vaara imilyawu, vakhala wira vekeekhai munimphenta Muluku? Kaasuwenle wira ohiy'ula kaamuwerya okhuma n'uhapaliwa, kaasuwenle wira ohiy'ula kaamuwerya weettasa ni okhala oohureya, kaasuwenle, ohiy'ula; vaakhanle wira eyo hata yaari mmurimani mwaka wira siiso, ni kaaronwe-ru khwiira, kisuwelaka wira Owo aamukilevelela, miyo nkaarowa wira. Kinnimuupuwela vanci-ene Owo. Miyo kinnimphenta Owo. Tthiri. Vekeekhai.

139 Mwaha wa yeeyo kahaarow'aka otumiherya musuwelelo aka hata muromolelo, (nnari, mulopwana), hata Asempeleya de Deus, hata Ekereja ya Muluku, hata Anawetta a Osantu, Metotista, Patista, Prespiteriyaano, Katolika. Nkaarowa okuxa hat'etthu kaakhanly'aka ovahiwaka, mwaha wa musuwelelo ola. Okhala wira, khonarweeke ni mutthu. Orwiye ni Muluku. Nnari, mulopwana. Nkaarowa otumiha ihaakhi saka s'eyuulupale mwaha wa rock-and-roll mmosa a Elvis Presley, nnakhala nikhuru na aKatolika awe, ahiiso yawawe, ahiiso, aCadillac, wala itoolare sawe imilyawu sene, ni sikina, owo omphwanyaaawe khula mweeri. Nnari, mulopwana. Miyo kinnimphenta Owo. Nto vakhala wira miyo... Vaakhalakaru wira kinnimphenta Owo siiso, kinookhala oororomeleya wa Yoowo. Ni vakhala wira Muluku ookiihana ni ookithanla, Owo oohela etthu mwa miyo, ni miyo kinnimphenta Owo.

140 Miyo kinnimuupuwela Mwenye Isler. Nyuwo othene munnimusuwela, anci-ene a nyuwo. Owo aahirwa va, mukhulupale a elapo a mpante wa Indiana; aahirwa va, khurumiha ekitaara awe. Okathi mwan'aka aakhwiw'awe, amwaar'aka yaakhwiw'aya, ni othene aya yaataleliwe-ene osulu nno vamahiye. Nto miyo kaarowa kittharaka ephiro, ni matat'aka ottuli waka, kinlaka. Owo khutupha okhuma vakamiyawu wawe, yaamukhaani ya khalayi, nto khurwa khukipweherya miyoono sawe, khwira, "Billy, kinthuna kookoheni etthu." Khwira, "Miyo kinniwiiwakani mulaleyaka mpakha ohalela omora vapulpitu. Kinniwiwakani munloothoni mphironi ni sothene, mukhuwelelaka mwaha wa Kristu." Khwira, "Vano Owo ohaakuxa atith'inyu. Owo oomukuxa muhim'anyu. Ohaakuxa oowaili, ni awo akhwiye mmoononi mwanyu. Iwe owo ohookhwa. Amwaar'inyu ahookhwa, mwaavarenle-ene mmatatani mwanyu. Ni tutthu anyu ohookhwa, ni nyuwo munvekelaka Yoowo wira ookhaliheryeni. Vano Owo koorukunuwelani ettuli Awe nyuwo. Munimuupuwelela exeeni Yoowo?"

141 Miyo khwira, "Miyo kinnimphenta Owo ni sothene siri mwa miyo. Owo akiroiha omooroni, miyo nlelo kinomphenta." Owo

t'exariya. Kahi p'uhimya tu; iyaakha miloko miili ni thanu na mosa sihooniherya eyo. Eyo ekeekhaii.

142 Vakhala wira nyuwo munnimpenta Owo! Kahi okhanyereriwa, wira, "Miyo nkikhanle wira *ela*, ni nkikhanle wira *ele*." Nyuwo munomphenta Owo vanci-ene wo wira, okhala wira Owo ohoothanlani. Nyuwo khamunatoko omuthanla Owo, Owo t'othanlalani nyuwo.

143 Nyuwo muhimmye wira, "Miyo kihaaphavela Apwiya, ni kihaaphavela Apwiya."

Khaavo mutthu onimphavela Muluku. Ti Muluku, onimphavela mutthu. Nyuwo pooti mwaari mphavelaka ocaliwa wa Yoowo, masi Muluku ohaana orukunxa mukhalelo anyu nyuwo muhinatthi hata owerya omphavela Yoowo, okhala wira, nyuwo mwa natampi, nyuwo mwa ekuluwe. Ti yeeyo.

144 Nto amosa-amosa wa nyuwo atthu munrowa okereja paahi ni munakhala ni omempuru anyu paahi, okhuma va ni wira itthu sothene mulaponi, vano nto nlelo ni otthika ni wira, "Ayo, kiniira mpantta wa ekereja." Ahe, eyo eri ottaiwenexa w'okhala a Muluku. Vekeekhai. Miyo nki. . . Masi nyuwo munniwoona atthu yiraka yeeyo, munoowerya osuwela. Oh, awo mamempuru ooreerela a mukereja. Eyo ekeekhaii. Nyuwo nlelo pooti okhala mempuru a mukereja ni wira itthu iyo, masi khivanweryaney a okhala muKristu mwiiraka seiyo.

145 Ntoko sihimaly'aka, voosiis'ula, "Nakhuku a khalayi, vakhala wira ootoko okhala namirima miili, owo nakhukuu." Ti yeeyo. Owo ni epompa yaakilaathanse ekalawa emosa, yaakilaathanse erinta emosa. Nto nakhuku a khalayi aahisiveliwa okathi waahiiw'awe orowa, khukhuma Ekereja ele, vaawery'awe okhumela iwe ni okhala v'enama yo wuntta ni "cau, cau," n'ukhuura ya *yeela*, okhuura ekhavalu, ni okhuura enyompe, ni etthu p'itthu, owo aanisiveliwa. Masi okathi Nowe aahiyaly'awe epompa orowa, eyo khiyaawenrye ophwanya omumula wa inawu saya. Eyo yaahikhalana ehaakhi emosaru yookotela va mwaamunama ookhwa ntoko nakhuku siiraly'awe, masi saari mikhalelo miili soovirikana. Emosa wa seiyo, yaari epompa, opacerya wene. Owo aari nakhuku, opacerya wene.

146 Masi, mwaweha vale, nakhuku mutokweene onniwerya okilaathi va vasulu v'enama yookhwa n'ulya, nihiku nuusu. Epompa enookilaathi mmatta mwa etriku n'ulya, nihiku nuusu. Nto nakhuku onniwerya ovava naanaanoru vale n'ulya yolya ya epompa, vanci-ene ntoko owo sinthun'awe. Owo aaniwerya olya etriku vanci-ene ntoko nakhuku sinwery'awe, ahiiso, ntoko epompa sinwery'aya. Masi owo, nakhuku, onniwerya olya yolya ya epompa, masi epompa khenwerya olya yolya ya nakhuku. Ti yeeyo.

147 Vano, namirima miili onniwerya orwa okereja, n'utteeliwa murima ni okhuwela ni waattottopela Apwiya, n'urowa siiso, ni

okhumela arowaka iwe n'upuha itthu sa molumwenkuni. Masi muKristu ooyariwa vasya khanwerya wira, okhala wira ophenta wa Muluku onoomukhanyererya mpakha nipuro nimosa owo ohikhanly'awe wiiraka.

148 Tivo nyuwo mwakhala muKristu paahi mwaha wo wiitakaniha mukereja, ni ohiya wira *ela* ni *ele*, ni otthuna weiwo ori mwa nyuwo, vannitthuneya nyuwo opwina-tho. Eyo vekeekhai ekhweeli.

149 Ni nyuwo athiyana munwerya waawara akaputtul'awo axikhaani, n'ukhumela nno mphironi, vano nto wisiihana mmansinyu "mulipa-oowaamini." Nyuwo mwa mulipa-oowaamini, masi mwa ethoonyeryo yoonanara saana, khino. Vaakhanle wira vekeekhai mwaahikkhalana Kristu mmurimani mwanyu, khimwaarowa hata okhala oowuupuwela itthu ntoko iyo. Nkincala etthu athiyana akina aniir'aya, ni axiruuusi akina aniir'aya, mwaamukhala oovirikana, okhala wira munnimphenta Kristu vanci-enexa.

150 Miyo kaalavula ni muthiyana mmosa nihiku nlo, vatthokoni, vano owo khuvexerya matata osulu so, khwira, "Reverendu Branham, miyo kinihalela ohiwar'etthu, mu mpaani mwaka. Kinimweetteeta."

151 Miyo kuupuwela, "Wuuliha muru." Owannyinyu, nkincala vatthu vary'anyu. Ti yeeyo. Mwiiwariheke ni mwiireke ntoko muthiyana, ntoko muhano vatthuney'awe wira. Wuuliha muru. Masi nyuwo muntthikela. . . Ayo, Bibilia ohimye wira, "Mwaaphentaka itthu iyo, itthu sa molumwenkuni, ophenta wa Kristu hata khokhanle mwa nyuwo." Nto mwaaphentaka Apwiya, ni murim'anyu wothene, ni munep'anyu wothene, ni muupuwelo anyu wothene, munimwiihuluxa itthu iyo sikhaani soonanara, soohiloka wa nyuwo. Eyo ekeekhai.

152 Ni nyuwo tiyaakono, ni nyuwo akina va, munkhumela mphironi nno, ni oripithula exiko anyu ni waaweha khula mmosa wa axithiyana awo. Wuuliha muru; ni wiisiihana mmansinyu "aana a Muluku." Koosuwela wira eyo ennirusula, masi fataari orusuliwa ohikhanle ohoolo waya opahiwa voohimala iwe. Vano mwairaka itthu iyo. . . Vano, khamukhanle wira etthu vakhala wira muthiyana onimweetta mphironi, oiwarinhe-ene nuusu. Nyuwo, mwanweha vale, vekeekhai munoomoona, masi munooowerya orukunxa muru anyu. Bibilia ohimye wira, "Ole oninweha muthiyana anwereihaka murima, moomala oraruwana vamurimani mwanyu."

153 Mukihiye kooleleni etthu emosa, munna muthiyana oophentiwa, munoorowa waakhula. Miyo khenikicala, nyuwo pooti okhala oolokaxa ntoko ekhokowa. Khino vekeekhai khamuntoko wira etampi ya enamuna yeeyo, etampi ya ohureya, mookhalaru. Masi nyuwo mwawara siiso, munoorowa waakhula w'Olamuliwani mwaha w'oraruwa ni khula mulopwana

oowenheni. Biblia oohimya. Ni weettasa mphironi, t'ani otthenke, mulopwana? Nnari, mulopwana. Ti nyuwo. Nyuwo mwiisoonihenrye siiso.

154 Muthiyana ookhalana nipuro nuulupale. Nlo nipuro noowaarya, nooreera, noothamaleya. Masi owo ohaana wiisuka siiso, wira ovarelele muteko awe ntoko orin'awe wira, ntoko mai, ntoko muthiyana a omaama. Omaama wahononiwa, muthana wa elapo woohononiwa. Nto mwaha wa yeeyo, olelo, elapo ahu ery'aya yoohononeya, mwaha wa onamuttompe w'athiyana ahu. Eyo vekeekhai ekhweeli. Vekeekhai. Ti wuntta eriyari ahu, enihonona.

155 Etthu entthun'anyu okumana ni Melikhiseteki ula emaara emosa. Amen. Mmuhiye Owo—mmuhiye Owo ooreeriheni ni ovaheni eviinyu, mukatthe, Ekumi Ehinimala. Vano munimoona ithu voovirikana. Vano nyuwo mu... Enookhala yoovirikana. Khamunrowa otthuna amiravo okhala ewoopelakani. . . muturi wa khwatte, muturi wa mwiici, wala etthu p'itthu muntthun'anyu wiihana. Vekeekhai nnari. Nyuwo munrowa okhala oovirikana.

156 Nto nyuwo muntthuna okileela wira munwara siiso, n'ukhumela iwo, mwaha wa niwoko nikina? Nyuwo muniira, "Vano, enikhala yooviraxa ettheke." Nyuwo munihimya eperwa. Kahi yooviraxa ettheke. Siyensiya onnooniherya wira kahi yooviraxa ettheke. Eyo e... Eyo ethaama enoorweelani, murokor'aka. Khamunsuwela. Nkineererya woosikulihani, masi kimphavela koolopoleni. Muthiyana mmosa oosuwanyeya, ooloka saana ntoko sinwery'awe okhala, muhano mmosa ooloka mwaamukhaani, onkhumela ota ni ithu iyo, mphironi, voohisuwela ahisuwelaka etthu onir'awe, mwaha wo wira mulaleyi mmosa otthikenle ottuli onimoova wira ai'y'anyu khanrowa-tho oliva sa namuloko saya mukereja. Vaakhanle wira owo aahitoko okumana ni Melikhiseteki, owo khaarowa wuupuwela ithu iyo. Owo aamulaleya Ehapari yooreera. Vakhala wira yaaamurusula espala ottuli waya, owo aamulaleya Eyo, khula enamuna. Eyo vekeekhai ekhweeli.

157 Nyuwo munimwiira, ni muniira okhala wira erooho ya ithaama eri vo. Ni nyuwo alopwana munaahiya axaar'inyu wira ithu ntoko iyo, kirina miroromelo vakhani sa nyuwo ntoko mulopwana. Ti yeeyo. Ti yeeyo. Vano, khasivo hata mittotopelo wa yeeyo, okhala wira, ahiiso, hata musammaha, okhala wira, eyo ekeekhaii. Khula mulopwana onrowa omuhiya mwaar'awe okhumela mphironi ni wira siiso, munna, mwaahaana okhala nwaraka ikuwo *sawe*. Ti yeeyo. Nyuwo, vano, wulu!

158 Miyo nkinihimya wira amwaar'aka khanrowa wira. Masi kihaana okhala oorukunxiwa ni oohononeya, wa ele ery'aka vano, vakhala wira kaamukhalakhala kikhalaka n'awo yiiraka yeeyo. Nto eyo ekeekhaii voolikana.

Axiruusi aka, awo pooti wira okathi aniphiereryas'aya okhala athiyana. Nkinihimya wira khanrowa wira. Miyo nksisuwenle. Eyo entthariha omoriwa ikharari wa Muluku. Miyo kinroromela wira khaniira. Awo yaira, anrowa onyakela mavekelo a tiithi mmosa naxariya. Awo anrowa onyakela makhalelo a mutthu ophavenle okhala oratta-ene, awo yaphiererya yiraka vale. Eyo ekeekhaii. Masi kintthuna kikhaleke oratta-ene, owiixuttiha oratta-ene, okhala oratta-ene, ni owerya waalaka oratta-ene. Awo yaira eyo, awo anoothukula ephiro aya voowiimana arowaka omooroni, eviraka vasulu v'olaleya waka, ni vasulu va Kristu aka, ni vasulu vo waalopola waka, ti yeeyo, awo yaphiererya wira. Vekeekhai. Ti yeeyo.

<sup>159</sup> Wuuliha muru. Vakhala wira mootoko okumana ni Kristu, ethoni ni ethoni, ni Owo onimooreerihani, ni ohela epeeco ele ya okupaliwa vamurimani vanyu, axetwani othene omooroni khankhalakhala ewiirihakani owara-tho seiyo. Ti yeeyo. Nyuwo moorukunuwa okhuma mookhwaani khuphwanya Ekumi, ni sootthuna sanyu siri mwa itthu s'osulu kahi itthu sa vathi. Amen. Vanreerela kihye mwaha ene owo. Ti woothananiha. Vaareera. Masi Ekeekhaii.

<sup>160</sup> Vaareera, nirowaka vano tho ohoolo vakhani, nto niroomaliha.

*. . . vekeekhaii ale ari aana a Levi, . . . anaakhela ya namuloko ya muteko w'enamukuttho, ni aakhalana yooruna yo waakhela sa namuloko s'atthu vootthariha ikano, eyo ti wii, s'axiinn'aya, vanamwi awo ekhumme muyuununi mwa Abrahamu:*

*Masi ole osuulu awe ahaari wa yaawo aahaakhela sa namuloko sa Abrahamu, khumureeriha ole aarina natiri.*

*Ni khivanaanyihieriwa nnakhala wira ole ori mukhaani tonreerihiwa n'ule ori muulupale.*

*Nto va atthu ankhwa t'anaakhela sa namuloko; masi va owo aahaakhela, ole onihimmwa wira ookhala. Nto miyo . . .*

*Ni ntoko sinihim'yaka . . . wira, hata, Levi . . . aakhela ya namuloko, aahaakhela ya namuloko, aahiliva sa namuloko mu'Arahamu.*

*Okhala wira owo nlelo aari muyuununi mwa atith'awe, okathi Melikhiseteki aakumann'awe ni yoowo.*

<sup>161</sup> Mwe—mweettelo anyu wa Kristu onookumiherya otthokelela wuulupale wa ele an'inyu anrow'aya okhala. Makhalelo anyu munkhal'anyu ohoolo w'amusi anyu anookumiherya otthokelela wuulupale wa ele an'inyu anrow'aya okhala. Okhala wira,



Bibilia ohimnye, wira, “Owo aamurowa othotola sootakhala s’axitiithi mwa aana mpakha nloko na neeraru ni na neexexe.”

162 Vano, okathi vakhani paahi, kihinatthi omaliha.

Vano *tivo* vaakhanle wira *oloka voomalela* (owo ori-tho vo oloka wanyu voomalela) *waattharihiwa onamukuttho wa aLevi*, (*okhala wira vathi va yoowo atthu yaahaakhela ikano*), *aaphaveleliwani wira arwe...namukuttho mukina okhumelela voottharihiwa Melikhiseteki, ni ohikhala owiihaniwa ntoko saarumme-awe Aroni?*

163 Ikano, mulipa ootthariha ikano, moone, “Oh, muhaana wira *ela*. Mwaahiire *yeela*, khamuhiyo muKristu. Nyuwo mwaahisukeke esaapatu! Mwaahi...Mwakhuuraru enama! Mwairaru itthu *iya!*” Ankhili ala othene ootthariha ikano. “Ni nyuwo muhaana orowa okereja. Mwahirowe, munooliva ehukhumu mwaha wa yeeyo. Nyuwo muhaana wira noveena.” Itthu iyo ti s’ethiru. Nyuwo munoopowa ni mahala a Muluku, mwaha wa osuwela khalayi ene wa Muluku, mwaha w’otthoma Wawe. Muluku aamwiihanne Abrahamu mwaha wo omutthoma, mwa osuwela khalayi ene. Owo aahimwiihana. Owo aahimunyokha Esawu, ni aahimpenta Yakope, hata mmosa a awo ohinatthi oyariwa. Ti yeeyo. Iwo—iwo osuwela wa Muluku khalayi ene onsuwela itthu iya.

164 Nyuwo muniira nto, “Eniphwanyihani olaleya Ehapari yooreera?”

165 Vano kinimooleelani, ila. Paulo ohaakhula eyo, ahiiso Yesu ohaakhula, kiiroke. Va ti Yesu. Owo ohimnye wira, “Omwenne wa Wirimu onlikana ni mutthu aarowenle *ela*, n—nratta wala ntthiya, khuriha ntthavi nawe. Owo khupurula. Vaavo, aahaakumiha akasa. Aahikhalana akhapa a maasi mariirya. Aahikhalana inowa. Aahikhalana anaakhwiitti. Aahikhalana anaphulu. Aahikhalana aranttaasi. Aahikhalana anamathola. Owo aahikhalana—*aahikhalana ihopa.*” Vano, mulopwan’owo aamutotha paahi.

166 Eyo eri ntoko Ehapari yooreera. Ela eri va vano, miyo kinlaleya Ehapari yooreera. Miyo kinriha ntthavi paahi. Kinoopurula, kiniira, “Othene anthuna, ole ontthuna, arwe.” Va anoorwa kamosa-kamosa, waltaari. Othene aya anrukurerya waltaari. Awo anoovekela. Awo animunla. Miyo nkinaahiyaniha mmosa ni mukina. Owo kuhiyo ti muteko aka. Nkirummwe wira kilamule.

167 Masi, aakhala kamosa-kamosa mmo akhanle anaphulu. Aakhala kamosa-kamosa akhanle anaakhwiitti. Aakhala kamosa-kamosa akhanle inowa. Aakhala, kamosa-kamosa, akhanle akhapa. Ni aakhala kamosa-kamosa akhanle ihopa. Kuhiyo muteko aka olamula. Miyo kiniira, “Tithi, va eri ele miyo kipurunly’aka.”

168 Masi, naphulu aari naphulu, opacerya wene.

169 Ranttaasi, ranttaasi uwo onookilaathi vale awehawehe, okathi vakhani, arukunxe maitho ale maalupale, awehawehe, aire, “Moosuwela? Miyo koovilela vanci-ene ya Yeela ntoko sinwery’aka ovilela.” Plop, plop, plop, plop, erowaka.

170 Muhano a khalayi enowa onoovenxa muru awe, ni aire, “Ahe, moosuwela? Vakhala wira anrowa olaleerya siiso, voovirikanya waawara akaputtula n’itthu sikina, eyo ennikikumihha. Tivo miyo kinookhuma nikhuru nle na masantu oophirikeya. Ti yeeyo tu erinaaya okhala.” Nyuwo mwaari enowa opacerya wene. Eyo ekeekhaii voolikana. Ayo.

171 Ni va okilante ti mwenye naphulu, ni sikaro ole muulupale mwaano mwawe, ntoko Tooru ookumihiwa manyaka a oTexas, onoovenya va awehawehe, aire, “Ahe, nkinooneke okhala oottheke onvura sikaro. Miyo kinookhuma mwa etthu ila paahi, naanaano va.” Ahe, nyuwo naphulu mutokweene, nyuwo mwaari yoowo, opacerya wene. Eyo ekeekhaii voolikana. Eyo ekeekhaii voolikana.

172 Mukhalelo anyu onnooniherya ele mukhanly’anyu. Makhalelo anyu annooniherya, annooniherya ele nyuwo mukhanly’anyu, ni wopaceryani. Kahi yookirikela woona yeeyo. Kahi yoorika wa nyuwo woona eyo.

173 Vaakhanle wira kaaronwe wa Roy Slaughter mulimi okilante va, nto koonale ikuluwe vanikutthani v’eturumu, silyaaka eturumu, nkaarowa wuupuwela hat’etthu yoonanara mwaha wa yeeyo. Eyo ekuluwee. Masi koonale-ru epwittipwitthi vasulu v’eturumu ile, kaamuxanka. Uh-huh. Munnona? Muhixanke, khamunrowa omoona owo vale. Owo khaawerya ovilela tu. Ti yeeyo.

174 Nto mutthu oniyariwa ni Erooho ya Muluku onninyokha itthu sa molumwenkuni. Ti yeeyo, “Okhala wira mwaaphentaka olumwenku wala itthu sa molumwenkuni, ophenta wa Muluku hata khokhanle mwa nyuwo.”

175 Vaakhanle wira keetta n’athiyana khula nihiku, n’urwa, waahimeerya amwaar’aka wira kinnaaphenta, awo yaamusuwela wira ka nawoothe. Sowiira saka saamulavula vancipale ovikana moolumo aka. Vekeekhai. Miyo kaamuwooniherya wira nkinaaphenta, okhala wira nkaari a ekeekhai w’awo.

176 Awo yaakihimenrye-ru wira annikiphenta, nto khula okathi kaarowaaka okhuma, awo enakhuma ni mutthu mukina, eyo yaamurowa wooniherya wira awo khanikiphenta. Ekeekhai. Soowiira saya sinnooniherya. Nkincala moota xeeni awo yaarow’aya weererya okileela, “Bill, miyo kinnoophentani, ni khokhanle hata mutthu mukina mulaponi woohikhala nyuwo,” Miyo kaamusuwela wira a nawoothe.

177 Nto nyuwo mweereryaka wira, “Pwiya, miyo kinnoophentani,” ni mwiiraka itthu sa molumwenkuni, Muluku onnisuwela wira mwa nawoothe, opacerya wene. Nto mwaha wa xeeni? Emphwanyihani okupali musuwelelo nuusu wa khalayi, ni etthu ekina ntoko yeeyo, osulu wuulupale wa Wirimu osanrye-ene etthu y’ekeekhai? Xeeni otthunaka okhala muKristu oniihimya, ootakhaliwa, a nuusu, ootokottha nuusu, oniihaniwa siiso? Okathi, munwery’anyu okhala mwaana ooyariwa vasya a Muluku, ni ittiwi sa otthapa sa Wirimu sirumaka mmurimani mwanu, muhakalalaka, ni mmuttottopelaka Muluku, ni mukhalaka makhalelo ooxintta mwa Yesu Kristu.

178 Muheereryaka wira mmansinyu, okhala wira munoovonya, opacerya wene. Masi mmukuxe Owo, Awo Masu Awe, ni mmumuleke vasulu va ele Owo ohimaly’awe wira ti Ekeekhai. Ni mmwaaminiki Yoowo, ni omphenta Yoowo, nto Owo onookhaliha itthu sothene ovara muteko voolikana wa mureerelo anyu. Ti yeeyo. Owo ti muupuwelo.

179 Apwiya yooreeriheni. Nkinthuna woopwapwelani, masi, munna, ti vooreera opwapweliwa vakhani. Nyuwo mwa axikhaani aka. Munnona? Ni khula paapa onaaphenta an’awe vekeekhai onimwaattharuxa, ahiiso owo kahiyo enamuna yooreera ya paapa. Eyo ekeekhai? Ti yeeyo. Nto paapa ola orina ekano emosa paahi, nto eyo ekano y’owaani. Ni Muluku orina ekano emosa paahi, nto awo ti Masu Awe.

180 Hiyo naaminiru Masu Awe, nto hiyo nnookhala ni Masu Awe. Owo muteko ahu, vakhala-ru wira hiyo nootoko okumana ni Muluku. Kahi mwaha wo wira nyuwo muniira, “Ahe, miyo kinnirowa okereja, nto kihaana wira *ela*.” Nyuwo mootakhaliwa. Muhiire yeeyo. Muntthunelani okhala nakhuku ootakhaliwa, ootemwa, ootakhala, vaweryaneyaka nyuwo okhala epompa? Vekeekhai. Nyuwo muhaana okhalana mukhalelo anyu woorukunxiwa paahi. Nto nyuwo murukunxe mukhalelo anyu, mukhale mwaana mulopwana ni muthiyana a Muluku, mukhale ni murettele ni Muluku.

181 Yesu! “Nave-tho siiso Yesu, wira Owo aareerihe atthu ni Ephome Awe, aahihaawa ottaiwene wa mukhora,” aHeperi 13:12 ni 13. Arooma 5:1, “Siiso nikhalihwaahu anaxariya mwaha wo waamini,” kahi mwaha w’ovahana matata, kahi ni opatiiso wa maasi, kahi mwaha wo wiixaatherya matata, kahi ni okhuwela, kahi ni olavula ilavulelo, kahi ni hata moonelo. “Masi nikhalihwaahu anaxariya mwaha wo waamini, hiyo nookhalana murettele ni Muluku mwa Pwiy’ahu Yesu Kristu.” Noovira mookhwaani khuphwanya Ekumi, khukhala soopattuxiwa isya, okhala wira hiyo noomwaamini Mwaana mmose-ene a Muluku, ni noomukupali Yoowo okhala Moopoli ahu. Nto Ephome Awe ennivara muteko, ohiy’ula, ntoko ettipiheryo ya itampi sahu, wira akhale voopuroni vahu.

182 Mwa Waataana wa Khalayi, naari nipuro nimosa paahi n'okhalana opatthana, waari vathi v'ephome. Khula mulipa-oowaamini aahaana orwa vathi v'ephome. Okathi mwaanyompe oothiyana ooxeerya aaviwaawe, owo aakhalihwa mukuttho wa etampi. Owo aahaana okhala ooxeerya. Nto ekapiitulu 19 ya Okhuma, akhala mutthu wa nyuwo aatthuna osoma yeeyo. Ni owo aahaana okuxiwa, nipita, othene, khupahiwa othene. Vano nto eyo yaakhalihwa maasi oovalaanyiha. Eyo yaaheliwa ota wa mikhora. Yaahaana oreheriwa ni matata ooreera. Ephome ya mwaanyompe ola yaamurowa . . . wa muthukumano, ni yaatatheliwa vamukhora vaara vathanu na vanli. Nto vano, khula mutthu opahuwa aattamela, aahaana toko okupali ni woona ephome eyo, ni osuwela wira opatthana onkhala paahi vathi v'ephome yeele. Nlo ti nipuro nimosa paahi mulipa-ookokhorela aakhanly'awe vekeekhai okokhorelaka mwa ikano, waari vathi v'ephome.

183 Vano, etthu yoopacerya owo aarin'awe wira, ahinatthi owerya orwa vathi v'ephome, yaahaana okhala maasi ala oovalaanyiha ootatheliwa yoowo, nto ole ootakhala aanikhalihiwa ooreera.

184 Nto awo yaakuxa maasi oovalaanyiha khimutathela mutthu namweetta, khunvalaanyiha itampi sawe. Vano nto owo aaneetta vathi va malepa ala mathanu na manli a ephome, ni aanikhhalana opatthana n'alipa-oowaamini akina Ohoolo wa Muluku.

185 Eri enamuna emosa paahi yo wira. Kahi ovahana matata, kahi wiitakaniha n'ikereja, kahi ni opatiiso, kahi ni miyoonelo; masi mwaattamele maasi oovalaanyiha, mwiixatherye matata anyu, ni waamini, vamuru va Yesu, nto mwiire, "Miyoka natampi, nto Nyuwo muhookhwa nipuro naka. Nto Etthu emosa mwa miyo ennikileela wira Nyuwo munookilevelela itampi saka, ni kinnookupalini Nyuwo okhala Moopoli aka vano." Nvire vathi va Ephome, iwe, mukhalane opatthana n'ana a Muluku. Ti yeeyo. Mukhuure mukatthe, nwurye eviinyu, ni mukhalane opatthana n'ekereja.

186 Oh, Owo kahi oothamaleya? Owo kahi ooreera murima? Vano, ela pooti okhala ntoko yootikiniha wa nyuwo, mpatthani. Masi exeeni—exeeni miyo eneemelel'aka va n'uhimya itthu iya? Kaamuhimya seiyo wira keererye wiikhaliha oovirikana ni mutthu mukina? Kaairaka, weeso onnikitthuna orukunxa murima. Miyo kinihimya Eyo okhala wira Muluku oroohimya Eyo, okhala wira Awo Masu a Muluku. Nto nwiiriyane. Onimoorwa okathi, nto vano ti yoola, atthu anrowaaya okhuma onikhuma nsuwa mpakha onkela nsuwa, ephavelaka ophwanya Masu a Muluku, nave ehiweryeke ophwanya Yaawo.

187 Mwaarowaka vamuthukumanoni, etthu yoopacerya muniir'anyu, nyuwo munoorowa mme nto awo ankhhalana nikhuru na ilavulelo ni otaphulela, nto mutthu mmosa

onoovenya n'ukhala ahimiyaka Soolempwa; nto eyo ti y'erutthu. Voomalela. Muluku onihimenrye wira "nihithikeleke moolumo eethiru," ankhi Yoowo? Vakhala wira Owo oolepa Eyo vamosa, nyuwo mwaamini. Owo khorina-tho y'ohimya Eyo. Ilavulelo ni otaphulela ti soolikana, masi ohaana okhala mutthaka woolukama ekereja ni wa mutthu, kahi mw'erutthuni paahi ni itthu ntoko seiyo. Vano nto nyuwo munoorowa ohoolo mwa itthu iya sothene sikina.

188 Nno nihiku nikina, alopwana anli yaaroovolowa mu... ni mulopwana mmosa n'amwaar'awe, ni mulopwana mukina n'amwaar'awe, amiravo yaammala-ru othelana, yaaroovolowa nipuro nlo, yaarowasa wAfrika ntoko mamisiyonaariyu. Mutthu mmosa khuyenya khulaleerya y'eprofeta, khulavula ilavulelo ni otaphulela, wira, "Awo mmosa aamuthenle mwaara a mukina." Wira, "Eyo khiyaarina okhala siiso. Awo yaamuthenle mutthu oovonyeya." Nto atthu ale anli khumwalana khutthikela, othelatho. Mulopwana mmosa khimukuxa mwaara a mukina, mukina, onihoolela muromolelo wa Pentekosite, nto khurowa wAfrika ntoko mamisiyonaariyu.

189 Munna, okathi onimukupaly'anyu natiri anyu, munkhala ooluttana ni natiri uwo mpakha okhwa wootaphulani. Vekeekhai voolikana. Vekeekhai. Okathi onimukupaly'anyu natiru uwo, owo onimooluttani.

190 Sothene iyo, ethiru! Ni yoophiyerya nipuro mpakha mwarowa mmakerejani, sinkhala sooriiryani ni sookhaleleya soowuuma, mpakha mphimo wa erooho onoorowa mpakha miloko mithanu vathi va ezeero. Atthu anookilaathi paahi ntoko ephutukuru vanxirini, onyuunya ni oohicaliwa ni ootthuka mannyaari. Nto nyuwo mwamwiiwa mutthu, ottuli iwe vanloothoni, onwerya omuhimya "amen" mukhaani, imaara kamosa-kamosa, ntoko wira enimwaatuthula, othene aya anrowa wookola exiko aya ntoko marattha, wira awehe, yoone etthu ekhumelenle. Moosuwela wira eyo ekeekhaii. Nkinihimya yeeyo ntoko eperwa. Nla khanihiyo nipuro no ohimya-vo iperwa. Eyo ti Ekeekhai. Ekeekhai. Miyoyo kinihimya okhala wira eyo Ekeekhaii ya Ehapari yooreera.

191 Nto epantte ekina, munikhalana nikhuru na ithiru na nikhuru na miyoonelo s'erutthu siiraneyaka, nto Masu a Muluku eekeekhai vookiserya aaphiyerya nipuro vanrik'aya wiiwa Yaawo: eriyari ya ephiro ya khalayi, Ehapari yooreera, Waarya wa ephiro aka, aleluya, Ephome ya Mwaapwittipwitthi, ophenta wa Muluku yoowo onnivalaanyihani ni itthu sa molumwenkuni.

192 "Nyuwo moolavula ilavulelo, munna? Khamurina Eyo. Mookhuwela mpakha woona oriira ovira ottuli wanyu? Moowona apoola a mooro?" Oh, ethiru! Kehiyo etthu iyo.

193 Nyuwo moomwaamini Pwiya Yesu Kristu ni omukupali Yoowo okhala Moopoli anyu? Nto Erooho ya Muluku ennikhalela

onamoona n'irooho anyu, wira nyuwo mw'ana alopwana n'athiyana a Muluku. Nto ekumi anyu ennikumiherya muhokorokho wa ophenta, ohakalala, murettele, ovilela, oreera murima, wiisumaliha, ohiviruwa pure. Vano nyuwo mwa muKristu. Vaahikhale, nkincala etthu eniir'anyu.

Paulo ohimnye wira, “Miyo kaamuwerya ovaha erutthu aka wira epahiwe ntoko mukuttho. Miyo kaasuwela isiiri sothene sa Muluku. Miyo kinoowerya weettiha miyaako ni waamini waka. Kinoowerya olavula ilavulelo ntoko atthu ni Malaikha. Nkihiyo etthu.” Ankhi iyo? aKorinto Oopacerya 13; mphwanye yaary'ene Eyo ekeekhahi wala nnari.

<sup>194</sup> Vano mphwanye vakhala—vakhala wira aKorinto, aKorinto Aneili 13, kookupali wira ti yeeyo. Wala, ahe, ti aKorinto Oopacerya wala aKorinto Aneili. aKorinto Oopacerya vo, aKorinto Oopacerya 13, ti yeeyo. “Hata kilavulaka ilavulelo s'atthu ni Malaikha,” soopiili iye sinweryaneya otaphuleliwa ni iye, sihinweryaneya otaphuleliwa, “nkihiyo etthu.” Vano zeeni othweelaka ni yeeyo, nto?

<sup>195</sup> “Hata kaasuwela miiriirya sothene sa Muluku.” Munrowela-ni oseminaariyu ni wiilipiha wira mwiixutte vanci-ene? Vanreerela mukhale oratta-ene ni Muluku, toko. Vekeekhai. “Hata miyo, ‘Oh, attotopeliwe aleluya!’”

<sup>196</sup> Moophiyerya nipuro hata muhinwery'anyu okhalana muthukumano voohikhala wira murina ekampaanya y'ovoniha wala muthinto mmosa wa miiriirya siniiraneya. “Nloko nootteettheya ni nooraruwa nimphavela yeeyo.” Munthuna exeeni ni yeeyo?

<sup>197</sup> Paulo ohimnye wira owo aamuwerya wira khula enamuna sa itthu, hata osusiha miyaako, ni nlelo khuhikhala hat'etthu. “Vale vari ilavulelo, sinoomalalama. Vale vari osuwela, onoolakaseya. Vale vari olaleerya, sinoovonya. Masi okathi ele eri yooloka voomalela enrwa'aya, eyo enookhala voohimala,” nto ophenta ti oloka voomalela. “Muluku oophentexa olumwenku, mpakha Owo onvaha mwan'Awe mmose-ene, wira,” othene ale anriiriwa, othene ale anthukumela, othene ale anlavula, othe- . . . ? “othene ale eni emwaamini Yoowo ehipweteye, masi ekhalane Ekumi Ehinimala.” Mwaamini yeeyo, anamwane.

<sup>198</sup> Awo aneererya okhaliha eyo yoorikaxa, itthu *iya* n'itthu *iyo*. Okathi, eyo eniphiiyery'aya mw'etthu emosa: omwaamini wanyu yeenyu Muluku. Ti yeeyo. Eyo ennihimya. “Tthiri mwaha wo waamini,” kahi mwaha wa moonelo. “Mwaha wo waamini,” kahi mwaha w'othukumela murima. “Mwaha wo waamini,” kahi mwaha wo woona wii. “Masi mwaha wo wamini munnoopowa; nto eyo ni . . .” Okhala wira nyuwo muhaaphavela Apwiya? Okhala wira nyuwo mwaari mutthu ooreera murima? Okhala wira, “Muluku ni mahala, ahoosuwelani khalayi ene ni khoothokiheryani Ekumi Ehinimala.”

199 Yesu ohimnye wira, “Khaavo onwerya orwa wa Miyo ehikhanle wira Atithi Aka anoomuruuha. Nto othene ole onrwa wa miyo, Miyo kinonvaha Ekumi Ehinimala. Khaavo onwerya waakumiha mmatatani mwAka. Awo t’Awaka. Awo t’owoopowa vohimala. Miyo kihaakuxa. Khaavo onwerya waakumiha mmatatani mwa Atithi Aka, nto Awo t’Ale akivanhe Miyo. Awo soovaha sa mphento Saka.”

200 “Ni othene Owo aasuwenly’awe khalayi ene, Owo oowiihana.” Owo khonimwiihana hata mutthu vahikhanle wira Owo aahimusuwela khalayi ene. “Othene ale Owo owiihann’awe, Owo ohaakhaliha anaxariya; othene ale Owo aakhalinhaawe anaxariya, Owo ohaavuwiha.” Tivo, moone, hiyo nri moomumulani wooloka voomalela.

201 Vano, koosuwela wira khareere atthu ootthariha ikano va, ipursento miloko mithanu na mixexe ni thanu na xexe a nyuwo. Masi, nwehe, nyuwo mwakuxaru Ela paahi ni osuwela wira nkineererya wooleelani etthu.

202 Vano nyuwo muniira, “Ahe, Munna Branham, miyo okathi wothene kuupuwelaka wira kaahaana wira *ela* ni kaahaana wira *ele*.” Yookhala yinci-ene—evirikanelo yinci-ene mwa yeeyo, munna, ele murin’anyu wira n’ile muntthun’anyu wira. Nyuwo munoopowa, kahi mwaha wo wira mwaahikhala mnaata ni yeeyo. Nyuwo munoopowa okhala wira Muluku owoopolani ohinatthi opattuxiwa olumwenku.

203 Nwiriyaane, nwiriyaane va, Bibilia oohimya, mwa Wiisuupulula, kinrowa wookuxani vano okhuma woopaceryani mpakha wookiseryani, Bibilia oohimya mwa Wiisuupulula, wira, okathi nirwiiyaaya nxeni, “Nlo naahiwoototha othene mulaponi,” nxeni naahiwoototha, “nlo naahiwoototha othene mulaponi, yaawo masin’aya yahaalempwe muLiivuruni mw’Ekumi ya Mwaapwittipwitthi,” Okhuma vapacenry’aya muhakalaliho, eyo enniweya oratta-ene? Ahe, okhuma okathi mulaleyi olaleiyaawe mutthak’ole woowerya? Okhuma okathi mulopwan’owo ovonihwaawe? “okhuma woopattuxiwani w’olumwenku.”

204 Yesu iiveliwe vayi, oKalvario? Nnari, mulopwana. Yesu iiviwe ohinatthi opattuxiwa olumwenku. “Mmoone Mwaapwittipwitthi a Muluku, yoowo iiviwe ohinatthi opattuxiwa olumwenku.” Muluku, wopaceryani, okathi Owo oonaly’awe etampi, Owo aahoona etthu yaakhumelenle, Owo aahilavula Masu. Ni Yesu iiviwe ohinatthi opattuxiwa olumwenku. Ni khula mutthu ooponwe, oopoliwe, ntoko sinihimy’aya Bibilia, okathi Mwaapwittipwitthi iiviwaawe mmuupuweloni mwa Muluku, ohinatthi opattuxiwa olumwenku. Nyuwo mwaahiheliwa mowoopowani nto. Vano munrowa wira exeeni mwaha wa Yeeyo?

205 Ti Muluku. Nittotopeliwe Nsina n'Apwiya! "Ti Muluku onvara muteko; kahi ole onthuna wala ole onthyyawa, masi Muluku onooniherya omoriwa ikharari."

Vakhala wira Yesu iiviwe ohinatthi opattuxiwa olumwenku, saakuxale miyaakha ikonto xexe ehinatthi okhumelela vekeekhai. Masi okathi Muluku olavunle-awe ottuli nno, khula Masu a Muluku t'olipa. T'ohirikunxeya. T'ohikawanyeya. Awo khakhanle ovonyaka. Nto okathi Muluku omwiivaly'awe Mwaana ohinatthi opattuxiwa olumwenku, Owo aahiiviwa vaavale vene ntoko Owo siiviv'awe oKalvario. Owo muhokorokho woomalihiwa, okathi Muluku onihimiy'awe siiso. Nto muupuwele, okathi Mwaapwittipwitthi iiviv'awe, woopowa wanyu waahiheliwa mmukutthoni, okhala wira Bibilia ohimye wira nsina nanyu "Nilempwe muLiivuruni mwa Mwaapwittipwitthi ohinatthi opattuxiwa olumwenku."

Ankhi yeeyo? Vano ninrowa wira exeeni? Ti Muluku onooniherya omoriwa ikharari. Ti Muluku owiihanneni. Ti Muluku oothanlalani mwa Kristu ohinatti opattuxiwa olumwenku. Yesu ohimye wira, "Nyuwo khamu—nyuwo khamunakithanleke Miyo. Miyo koothanlalani. Ni koosuwenleni nyuwo, ohinatthi opattuxiwa olumwenku." Eyo eri vo.

206 Tivo, moone, eyo ennikumihwa woova mwa nyuwo. "Oh, kinniikoha sinto kaamuwerya okhala kivarelenle? Kinoowerya, attotopeliwe Muluku, vakhalaru paahi wira kinootthikela kivarelelaka." Kahi vakhala wira kinoovarelela, wala nnari. Ti vakhala wira Owo oovarelela, wala nnari. Ti ele—ele Owo oiraly'awe, kahi ele miyo kiiraly'aka. Ti ele Owo oiraly'awe.

Eyo eri vathi va ikano sa ovuluxa. Ela etthu ekhaani entthun'aka ohimya kihinatthi omaliha.

207 Ankhi ekhavalu yuulupale yaamuyanre mwaapuuru? Nto mwaapuuru uwo aarina maaru oomanli oomora. Owo aari oovirikana maitho, ni makutha ookhoropana, metto sookhoropana. Mwiila awe woovenya orowaka osulu. Mwaamunama xeeni oonanara! Vano, khula mutthu... Ankhi mwaapuuru uwo aawerya wuupuwela, wira, "Vano, nwehererye minuutu mmosa. Awo yakhumaru owaani voosiis'ula, kinimooleelani, vekeekhai kinoomaniwa vamuru. Okhala wira, awo khanrowa okilyiha. Nkawehani etthu xeeni yoonanara kikhanly'aka. Miyo nkirina hata okathi."

208 Ahe, ti yeeyo. Khamurina okathi. "Ahe, miyo kiyariwe molumwenkuni mu, masi nkawehani va etthu yoonanara kikhanly'aka. Tivo miyo—miyo—miyo—miyo nkinrowa okhalana okathi. Nkinrowa owerya. Nkinrowa owerya." Munnona?

209 Masi ankhi ame awe yakhala ooxuttihiwa saana mwa ikano? Awo animwiira, "Mwan'aka, eyo ekeekhaii. Nyuwo muri othene oonanara, ni hata khamumphwanela olya yoolya vatthayani. Ti yeeyo. Khamuniphwanela. Masi, mwan'aka, mwa enamuna



emosa wala ekina, nyuwo mwa oopacerya aka. Ni, nyuwo moosuwela, nyuwo muyariwe vathi va ihaakhi s'eyuulupale. Ni namukuttho khonrowa okhalakhala owoonakani. Masi, mwaha wa nsina nanyu, ohaana okhala mwaapwittipwitthi oohittheka oohikhalana nlepa, orina okhwa voopuroni vanyu, wira nwerwe okhala.”

<sup>210</sup> Ahe, mwaapuuru uwo aamuwerya okumaniha ikhosa sawe n'uviriha okathi wooreera. Khivanvirikana etthu owo okhanly'awe, okhala wira owo khonrowa wooniwa ni mphuki, namukuttho. Ti mwaapwittipwitthi namukuttho onimuweh'awe. Kahi mwaapuuru; mwaapwittipwitthi!

<sup>211</sup> Nto ti Kristu Muluku oninweh'awe, kahi nyuwo. Ti Kristu. Tivo vakhala wira khanivo hata nthowa mwa Yoowo, vanweryaneya sayi okhala nthowa? Owo onwerya sayi ophwanya nthowa, okathi okhwiyaanyu ni ekumi anyu eri yoosukiwa mwa Kristu mwa Muluku, ootthittiwa ekanyeryo ni Erooho Yoowaarya? “Ale aniyariwa ni Muluku khaniira etampi, maana owo khokhanle wira etampi.” Onwerya sayi owo wira etampi okathi mukuttho wooloka voomalela omphwanyaney'aya voopuroni wawe? Muluku khonikiweha miyo, Owo oninweha Kristu, okhala wira hiyo niri mwa Kristu.

<sup>212</sup> Vano, vakhala wira kinnimpenta Kristu, kinookhala ni Yoowo. Owo khaarowa okikeliha vahaakhanle wira Owo aahisuwela. Vaakhanle wira Muluku aamukoopola olelo, asuwelaka wira Owo aarowa okirimeeliha isumana thanu na mosa okhuma olelo, Owo onoonona etthunelo Awe. Ekeekhai. Owo hata khonsuwela y'ohoolo nto, vakhala wira Owo ookoopola, asuwelaka. Xeeni Owo onrowaawe otthuna ookoopola, asuwelaka wira Owo onoorowa okirimeeliha? Muluku khaniira itthu, vano mwa isumana piili anattthikeliha ottuli, wira ammaliherye natiri Awe. Okathi Owo oniwoopolaaweni, ti y'okathi ni Ohimala.

<sup>213</sup> Vano, nyuwo pooti othukumela murima, ni wira, “Oh, ayo, attottopeliwe Muluku! Aleluya! Miyo koolavula ilavulelo. Miyo kookhuwela. Kookhalana. Aleluya!” Eyo khenihimya wira mookhalana. Masi, munna, okathi Etthu erwiiyaaya vathi *va*, nto nyuwo khwiitthukela nankura ni Kristu, vano mihokorokho sa Erooho sinimoottharani. Hiyo ninnikhalela onamoona, erooho ahu ni Erooho Awe, wira hiyo n'ana axilopwana n'athiyana a Muluku. Xontte mukhalane Eyo, apatthani.

<sup>214</sup> Miyo kinimookhalihani vaava ohiyu wothene, kilavulaka yeeyo. Miyo kinniphenta Eyo. Miyo kinnoophentani. Miyo kinootthikela etapernakulu ila yaamukhaani, okathi p'ukathi, Muluku ainanela vale ekumi aka. Kintthuna kiwooneni nyuwo murine-ene mitathaari ni olipa mwa Waamini iwo Woowaarya. Nkinthuna owoonani okuxiwa nno ni nno ni khula ettheku yaamukhaani ya mwiiixuttiho, onivira, ni wootikinyani, ni

wira itthu, ni okhalana ephome vakhani mmatatani mwaya, wala okame vakhani wiitho waya, wala etthu ekina, ni woota muthinto mmosa wa—wa—wa waarya ohoolo waya, ni muthinto mmosa wa e—etthu y'eralala, ntoko Bibilia sihimaly'awe, "Oowiittototopa mmurimani mwawe, ni oohoona hat'etthu." Ti yeeyo. Miyo kintthuna wira nyuwo mukhale oolipa mwa Masu. Vakhala wira ti SIISO ANIHIMYA T'APWIYA, mukhale ni Yaawo, mukhaleke ni Yeeyo. Owo ti Urimi Tumimi a nihiku nla. Muluku onthhuna wira nyuwo mukhale ni Yeeyo. Yaahikhale mwa Masu, vano muliyale eyo. Mmukhaleleke Muluku, mmukhaleleke Kristu.

<sup>215</sup> Nto murim'anyu wapacerya ohapuwa, moosuwela wira yookhala etthu ekhumelenle, mutthikele waltaari mwiire, "Kristu, muuluule sawaka...ohakalala wa woopowa waka. Mukivahe ophenta iwe kaatonko aka okhalana. Onooyeeheya, Pwiya. Yookhala etthu kiiraly'aka. Mukikhalihe-tho oowaarya, oolipa. O Pwiya, khiivo kaakhanly'aka wiiraka. Nkinwerya ohiya *ela* n'uhiya *ele*. Miyo kinoowehani Nyuwo wira mukumihe mwa miyo, Pwiya, ni kinnoophentani."

<sup>216</sup> Nto mukhume waltaari vo, mutthu musya mwa Kristu Yesu. Vano khamunrowa okhala oolipana ekerej'anyu, olipana namukuttho anyu, olipana pastore anyu. Nyuwo muri oolipa ni Ephome emwaraxiwe ya Pwiya Yesu. "Ni mahala nyuwo munnoopowa."

Nivekele.

<sup>217</sup> Pwiya, miixuttiho xeeni soolipa! Ola okathi ekerej'ela enwery'aya waakhela enama, ni kahi eleethi-tho ya Masu. Khanireere okhala muleethini vano, ninvahaka mwaana esuupha awe. Masi nihaana okhalana inama soolipa, maana nihiku ninimwaattamela. Okathi muulupale wowoopiha ori vakhiviru, ni mikattyamiho sinci-ene simphwanyaneya mphironi. Ni noosuwela wira khonkhalakhala-tho okathi wooreera. Hiyo noosuwela wira niri woomalelani. Okathi onrowa otthikela okhalaka wootepa ni wootepa mpakha Yesu orwa, vootthariha Soolempwa.

<sup>218</sup> Hiyo khanikhanle okupalelaka seiyo hat'etthu mwa ekumi ila. Masi mw'ekumini enoorwa, ninoowerya okupalela seiyo Ekumi Ehinimala mwa Masu Anyu, awo yamwaaminiru Mwaana a Muluku ni omukupali Yoowo ntoko Ettipiheryo aya, ntoko Mmosa Ole okhanle voopuroni vaya, ntoko Mmosa Ole okunxe itampi saya. Munivahe vano.

<sup>219</sup> Wira alipa-ooaamini ekhale alipa-ooawaamini. Wira anawetta okereja, va ohiy'ula, yaawo aneettela etiini ni ekhalaka paahi mukereja wira awo yaakhele musuwelelo ni Muluku; wira ophenta iwo okele mmurimani mwaya, wira yinle mwaha wa itampi saya, ekhwe wa yaawo, ni eyariwe vasya ni Erooho Yoowaarya, ni ekhale oowiimaaliha ni ooreera

murima, oophenta, ni oosareya ohakalala ni iparakha. Ekhalaka makhalelo, mpakha ankhal'aya oolukiwaxa wira yaakhalihe atthu anaarukurerya, oovoliwa ntthona wira ekhale ntoko awo. Munivahe, Pwiya, maana hiyo ninvekela mwa Nsina Nawe.

Nto ni miru sahu soowuurama.

<sup>220</sup> Kaatthuna kisuwele, ohiy'ula, sinto aamukhala mmosa va, oniira, "Munna Branham, kaaphimmwe-ru vapalansani va Muluku okathi ule, nkaakhalakhala, nnakhala, nnakhala kiweryaka ophiyerya ephavelelo yeeyo munihimy'anyu ohiy'ula. Kintthuna wira mukuupuwele mmavekeloni, wira kirukunuwe iphiro saka, ni wira Muluku akele akumihe ethiru ila mwa miyo ni akikhalihe muKristu eekeekhai?" Mwaamutthuna ovenxa ntata wira koovekeleleni, nyuwo, mwatthuna vale? Muluku ooreeriheni. Muluku ooreeriheni. Muluku ooreeriheni, ottuli. Muluku ooreeriheni. Muluku ooreeriheni, mulopwana. Muluku ooreeriheni, munna. Muluku ooreeriheni, murokor'aka.

Oowaarya, Oowaarya, Oowaarya, Apwiya  
Muluku a anakhotto.

Erimu ni vathi ti soosareya Nyuwo,  
Erimu ni vathi sinoovuwihani Nyuwo,  
O Apwiya Aalupalex.

Oowaarya . . .

<sup>221</sup> Muupuwelaka vano, nvekelaka, okathi munoon'anyu okupalihiwa wira munikhalaka oovonya, ni nyuwo muntthuna okhala saana, mwaamuvexa ntata nanyu paahi, mwiraka, "Muluku, mukikhalihe ele yaatthuneya wira kikhale?" Muluku ooreeriheni, mwamuthiyana. "Muluku, mukikhalihe ele yaatthuneya wira kikhale." Muluku ooreeriheni, munna mulopwana, muthiyana, nyuwo, nyuwo, nyuwo muri *va*.

<sup>222</sup> Nihiku ninoomala. Koosuwela wira ti yoolipa, apatthani, masi vanreerela osuwela Ekeekhai vano. Vano voomaaleleya nvekele.

Oowaarya, Oowaarya, Oowaarya, Apwiya  
Muluku . . .

Awo paahi, t'owaarya.

. . . oosareya Nyuwo,  
Erimu ni vathi sinoovuwihani Nyuwo,  
O Apwiya Aalupalex.

<sup>223</sup> Tithi a Wirimu, okathi nsuwa nintupweel'aya makaaripi, iphera sinoothukumana mmirini n'ale oophenteya aya. Axipalame othene anrowa mpuruni mwaya. Ipompa sinoovava n'ukatela mmikhoyini, osulu, wira inowa sihaahaaxe ohiyu. Iyo sinikhala mme ni wiipelana emosa ni ekhw'aya mpakha orowa orupa. Nsuwa vookiserya ninootupweela.

<sup>224</sup> Nihiku nlo hiyo ninoophiya ewoora yeeyo. Otupweela wa nsuwa onimwiiraneya. Nkisuwenle liini, Pwiya. Masi aakhala

atthu va ohiy'ula akupanli wira awo annikhalaka oovonya, ni antthuna ephiye nipuro nenlo, ntoko Lincoln aaphiyaly'awe vaavo okathi waakhw'awe, khwira, "Murukunxele ethoni aka ontupweela nsuwa." Nto owo khupacerya, "Tith'ihu muri Wirimu."

225 Ntoko Moody a khalayi saahimaly'awe, "Nno okhwaa? Nla nihiku naka noowarihiwa ekhara."

226 O Ole Oohimala, nwaakhele naanaano va, mwaha wo waamini, ary'ene vale mukhukuluni mwaya. Nyuwo moomana murim'aya, vakhukuluni. Owo ti altaari aya. Ola okathi wa Nyuwo owaakhela, naanaano va. Nyuwo muhimmye wira, "Ole onrwa wa Miyo, hata mano nkinimurihela ota."

227 Nto nihiku nimosa nsuwa nitupweelaka, amwaar'inyu wala aiy'anyu yeemenle-ene waattamela voolilini, mameetiku akhumme-ene. O Oowaarya, Oowaarya, omaaleleya iwe, wooreera woosivela, okathi vakhani nsuwa nihinatthi otupweela. Nawerya ovenya ni wira:

Otupweela nsuwa ni Ettheneri ya Makaaripi,  
Wiihana wowiiweya wa miyo!  
Ohikhale okhupanya opatari,  
Karowa-ru ophareya.

228 O Muluku, mwaavahe yeeyo okathi ula awo anlipelel'aya, elipelelaka eparakha ya Muluku waarweela. Mukumihe oviruwa wothene, olunwenku wothene, mwa yaawo, ni mukhalihe murima musya mwa yaawo. Nyuwo moohimya wira, "Miyo kinookumiha murima wa khalayi, kinoohela-mo murima w'erutthu. Nto Miyo kinoohela-mo Erooho Aka mmurimani mmo, nto awo anaamweettela ikano Saka ni yiiweleleke sooruma Saka." Okhala wira, ti yooruma ya mphento, nto kahi ya muteko. Ti ya mphento. Nto mphento onninihiha wira. Owo muteko wa mphento, onninihiha. Ti muteko ahu otthara mphento. Nto kinnivekela, Muluku, wira Nyuwo nvahe owo khula murima ovenxale ntata ohiy'ula.

229 Nto ale ahivenxale ntata, awo vano, ni mahala, avenxe matata wira yookupalini Nyuwo, ni wira esarihiwe Erooho Yoowaarya mw'enamuna ela yowiimaaliha, yoosivela, yoomaaleleya, yoowiiyeviha; ni okhala oosareya mahala, okhuma va ntoko mutthu orukunxiwe. Moota axipalame anrowaaya wiipa voovirikana, moota atthu othene anrowaaya okhala oovirikana, nuuvira okathi ula, O Apwiya Aalupalexa.

Oowaarya, Oowaarya, Oowaarya, Apwiya  
Muluku a elapo ya vathi.  
Erimu ni vathi ti soosareya Nyuwo,  
Erimu ni vathi sinoovuwihani Nyuwo,  
Apwiya Aalupalexa.

230 Nyuwo vano ni miru sanyu sowuurama, nyuwo nvenxale matata wira muupuweliwe mmavekeloni, nyuwo munoona ntoko

wira Muluku oolavula ni nyuwo mwa enamuna emosa vano, kahi mwaha w'owuukhuwa, masi etthu emosa paahi vathi mwa nyuwo, munnoona ntoko wira Muluku ohoovahani Ekumi Ehinimala? Munnoona ntoko wira munookhuma mukereja ohiy'ula ntoko mutthu oovirikana? Mwaamutthuna ovenxatho matata anyu ohiy'ula? Muluku ooreeriheni, mwan'aka. Muluku ooreeriheni, munna. Muluku ooreeriheni, murokor'aka. Muluku ooreeriheni. Ti yeeyo. "Miyokinoorowa okhuma ekereja ela, ohiy'ula, mutthu musya." Anamwane ooyariwa naanaano Momweneni mwa Muluku.

<sup>231</sup> Exeeni yiiraneieye? Koosuwela wira ti yooruma y'orwa waltaari. Owo altaari a eMetotista, yooruma ya eMetotista, kiireke. Owo okhalihiwe mukereja Metotista, mahiku a John Wesley. Khonakhaleke mahiku a Bibilia. "Othene ale yaamini yaahincereriwa Mukereja." Nyuwo munoowerya waamini khula nipuro varyaanyu, vapuwani, mphironi, nipuro pi nipuro. Nipuro pi nipuro, khivanvirikana hata vakhani, siiso ntoko munimukupaly'anyu Kristu okhala Moopoli anyu. Owo muteko wa Erooho Yoowaarya enwa mmurimani mwanyu. Okathi onimwaamini-anyu Yoowo, mmukupali Yoowo, moovira mookhwaani khuphwanya Ekumi, vano munkhala soopattuxiwa isya mwa Kristu Yesu.

Muhikivire, O Moopoli ooreera murima,

Vano nvenye mweemele.

. . .wunla waka wo wiiyeviha;  
Okathi oniwiihan'anyu akina,  
Muhikivire.

<sup>232</sup> Vano kintthuna wira mmiravo ni mwali, yoowo kinoon'aka wira ti mwaar'awe, nvenxale ntata nanyu, kintthuna wira nvenxe-tho ntata nanyu ottuli iwo; mwan'aka, nwanre ekhasako yooxeerya, ni muhano, awo amukupanli Kristu okhala Moopoli aya. Mmiravo okilanthi va vakhaterani va iroota, omukupanli Kristu ntoko Moopoli awe, oonale wira Muluku aahimooopola. Ni akina ottuli iwo nvenxale matata anyu, nvenxe-tho wira athu ewerye owehaweha, ekhalane opatthana ni nyuwo.

<sup>233</sup> Nvahane matata n'awo, mutthu vakhiviru, eemenle vakhiviru n'awo. Mwiire, "Muluku ooreeriheni. Munnaakheliwa Momweneni mwa Muluku, munn'aka, murokor'aka." Opatthaana, ti yeeyo hiyo entthun'ahu. Muluku ooreeriheni. . . Nvahane matata ni mmirav'ola va vakhaterani. Apwiya akhale ni yoowo. Ti yeeyo. Hiyo nnoowaakhelani moopatthanani wa Erooho Yoowaarya.

<sup>234</sup> Nyuwo mwaira muhipatisiwe nlelo, nto munatthuna opatisiwa, murwe mmuleele pastore yeeyo. Etanki va yookhalana maasi, ohiy'ula, mwaatthunaka opatisiwa. Sothene ti soolikana. (Nyuwo mwaahikhalana opatiiso, khula enamuna?) Masi etanki ti yoolikana, akhala mutthu onthuna opatisiwa.

Bibilia ohimnye wira, “Murukunxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi sanyu, nto munimwaakhela yoovaha ya Erooho Yoowaarya. Tthiri natiri t’awinyu ni an’inyu, ale ankhala ottaiwene, othene ale Apwiya Muluku ahu antthun’aya owiihana.”

<sup>235</sup> Munnimpenta Yoowo? Nvenxe matata. Oh, owo kahi oothamaleya? Enoosivelani sayi Eliivuru ila y’aHeperi? Ennoosivelani Yeeyo? [Muthukumano oniira, “Amen.”—Mol.] Ayo. Vooreerexa. Vano, Eyo ti yootharuxa. Oh, Eyo ti yoolipa ni Eyo ti yoowookowa, masi hiyo ninniphenta yeeyo. Ti siiso hiyo onttthun’ahu okhalana Eyo. Khinaarowa otthuna Eyo mwa enamuna ekina.

<sup>236</sup> Vano, nyuwo munnaamini wira Paulo ookhalana elamulelo wira alaleye Yeeyo siiso? Paulo ohimnye wira, “Narwa Nlaikha ni khunalaleya ehapari ekina, nitakhaliwe.” Eyo ekeekhahi? Tivo hiyo ninnimpenta Owo ni murim’ahu wothene.

<sup>237</sup> Vano kinrowa onvekela pastore orwa va okathi vakhani paahi, munn’ihu ooreerexa, Munna Neville, nto owo onookhalana nuulumo no wooleelani. Nto vano, Apwiya yatthuna vale, nnoowoonani Namararu ohiyu, ni nnimwiitthokiherya orwa wa Munna Graham Snelling wa ohiyu omosa wa muthukumano. Vano nto wa olaleya va ninootthikela ni kapiitulu 7 ni 8, Namararu ila enrwa ohiyu. Munna Neville.



*AHEPERI, EKAPITULU YA NEETHANU NENLI* <sup>1</sup> EMK57-0915E  
(Hebrews, Chapter Seven <sup>1</sup>)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 15 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)